





176  
Ca-  
cula.  
athal.  
es.  
S

tis





# SCIENTIA SANCTORUM NOSSE MORI

Pauculis Præceptis

comprehensa,

*Per Virtutum præcipuarum*

*Exercitium*

olim

Breviter digesta

A

Quodam Patre Societatis  
IESU:

*Nunc vero,*

Ad utilitatem animarum

Reimpressa

---

VILNÆ Typis Academicis Societatis  
IESV. 1699.

# ORATIO

Pro felici morte,

Ad

## IESUM & MARIAM.

**D**VLcissime IESV, per illam amaritudinem, quam sustinuisti propter me in Cruce, maximè quando anima tua benedicta egressa est de corpore tuo, miserere animæ meæ in egressu suo.

**D**VLcissima Mater IESV, Patrona mea, visceribus misericordiæ plena, succurre mihi misero peccatori, antequam mors subitanea & improvisa superveniat; nè imparatus de hoc mundo transeam. Ora pro me Virgo benedicta, ob Vnigeniti tui Passionem, ac mortem acerbissimam, ut peccati detestatione, diaboli operumque ejus abrenunciatione, & humili confessione, poenitentiâ, satisfactione dignâ Venerabilis sumptione, & proximi dilectione, de hoc mundo transeam tuo

Filio reconcilia-

tus, Amen.

BJ Bien. B. II. 20

Bè-

## BENEVOLO LECTORI.

**F**ingor campanarum vice, quæ  
Templum haud ingrediuntur,  
ad id tamen sonitu suo homines  
convocant. Nec ego Devotionis cultor  
(uti deberem) alijs verò ejusdem oc-  
casio & incitamentum esse cupio.  
Hunc igitur Libellum à doctis san-  
ctisq; viris compositum utilitati tuæ  
dilectæ in Christo Lector consecro, tu  
meæ quæso consulas salutem, quæ ex me-  
ritis proprijs, gehennæ propior quàm  
cælo, tuis adiuta suspirijs mereatur  
converteri ad Dominum, in quo solo  
vita & salus. Hanc tibi ex animo  
precor, tu eandem mihi exora, va-  
le eternum comprehensor eorum, quæ  
preparavit Dominus diligentibus se,  
meq; ad laciniam vestis tuæ trabe  
post te.

Devoti Lectoris, scabellum pedum  
utinam! non obliviscendum AK.



LECTORI AMICO.

Bonæ mortis cupido,  
Bonæ vitæ negligenti,



Mice Lector, mortalem te sentis,  
Moriturum te credis,  
Moriendi rationem nescis,  
Mortem bonam desideras.

Tuum illud ac meum omniumque mortali-  
um est votum,

Mori omnes, sed bene, cupimus,  
vivere omnes, sed bene, non laboramus,

Votum illud nè eludat fatum,  
Hoc desiderium nè in delirium evadat,  
Spem mortis bonæ non à morte  
Sed à vita sumamus.

Parum securè speratur in morte, quod  
est sollicitè præoccupatum in vita.

Non est quidem arbitrij nostri, vivere aut  
mori, quando libet; est tamen, vivere be-  
ne, ut bene mori contingat.

Spatium definire utique non licet,  
Præcipere modum licet.



Methodus bonæ vitæ, est modus bonæ  
mortis.

Et quia id providere, prudentis est,

Id agere, felicitis est.

Nè fallat desiderium, præveniat studium.

Disce, quod vis exercere:

Mori disce,

ut moriaris bene. mel,

Non disces moriendo, quod continget se-

Sed vivendo, quod annos plures: ita sci-

licet, ut vixisse optabis, cum egeris

mori.

Mors bona est, quam vita bene acta facit  
bonam.

Vt itaque moriaris bene, vale diu,

Moriturus semel, victurus semper:

Quod quâ ratione assequaris, pauculis

hisce complexus tibi offero:

Lege fruiere.

Mors obeunda semel, cunctos di-  
scenda per annos,

Scire mori si vis, tempore disce  
mori.



# SCIENTIA SANCTORUM NOSSE MORI.

## I.

Necessaria omnibus.

## Nemo



Taque vivit sceleratè, quin optet  
mori bene.

Desperatissimæ vitæ est,  
qui mortis bonæ caret voto.

Roga, quem voles improbum;  
Talisne mori velit, qualis vivere audet?

Offendes neminem,

Ita parùm sollicitum fui, cautum futurum  
Nisi, qui aut Deum neget, aut inferos ne-  
sciat, aut rideat æternitatem:

Quod itaque adeo est in votis, cur non  
præstatur factis?

Quod sperant omnes, cur pauci curant?

Ita multis vivitur,

Vt sperari, nisi miraculo, mors bona non  
possit: Cur rejicitur

In tempus alienum, quod habet suum?  
Quod, dum negligitur, nunquam tempori  
præstatur.

Cur aliquando facturum statuis,  
quod aliàs, aut non poteris, aut non voles?  
Et iam dum potes, negligis?

Vis dicam, quò vivere differas?

Dum *mori* cogêris,  
Voles scilicet, cùm erit desinendum, inci-  
pere. At, quæso te,

Vnde ista bonæ *mortis* fiducia,  
Cùm nulla præcedat bonæ *vita* cura?  
Nunquid mereberis vivendo malè, *mori*  
bene; nunquid,

Qui *viventem* misericorditer tolerat,  
*Mortuum* iustè non iudicabit?

*Disce ergo mori.*

Id non discere, ac nescire quidem velle,  
pessima est inertia: vide,

Quæ, nè occupet, omni industria tua pro-  
De te agitur: age non segniter.

Negotium istud, negotiorum summum est;  
Lucra in eo damnaque vertuntur æterna.





## II.

### *Experienda semel. Momentum est*

**Q**uo experienda hæc Scientia est:  
Adeo quippe *Nôsse Mori*, arduum est,  
Vt, cùm illud annis centum didiceris,  
Momento solùm unico experiaris.

*Ad momentum* ergo istud,  
per omnem te vitam exerce,  
Nulla satis diuturna ad id disciplina est,  
Nulla sera, nisi cùm iam proximum est:  
Omnes eodem spes tuæ ac timo-  
res,

Curæ omnes, sollicitudines,  
Omnes cogitationes & affectus spectent:  
Ad illud, confluent omnia mala tuæ;  
Quæ cùm plurima sint; & spontanea,  
Vnde fiducia reo?

Sapies, si tempori expies;  
Ad illud concurrent omnia bona tuæ;  
Quæ si modica sunt, si imperfecta insuper,  
Vnde solatium iudicando?  
auge, dum potes, & perfice.  
Ad illud comitabuntur te omnes pravæ  
consuetudines tuæ,

Vitiorum tuorum nutriculæ;  
quas tu, quâ ratione cohibebis tunc,  
Cum natura erit infirmior, impetus vehementior,

Gratia, quia neglecta minor?  
Excindes, si melioribus corrigas.  
Ad illud sequentur te omnes affectiones  
tuæ,

Timores, ante alias, & angores.  
quos tu, quâ ratione frænabis infirmus,  
Cum vincaris, sanus?

Oppugna, ut vincas:  
Ad illud sistent se omnes tuæ obligationes,  
quibus Deo teneris & proximo,  
Non recessuræ, quoad te expèdieris.

Id tu, poterisne tunc,  
Cum aut nihil, aut parum poteris?  
Age ergo, ut nihil cuiquam debeas,  
nisi ut diligas:

Ad illud adrepent omnes poenæ tuæ,  
tam quæ ex culpis dimissis sunt relictæ,  
quàm quæ ex novis commissis sunt additæ:

Quando verò, & ubi expiaberis?  
diluas in tempore, ne luas in æternitate.  
Ad illud properabunt omnes adversarii  
tui,  
extremum te, & vires tuas experturi:

qui

quî cûm te sæpiùs victo, animosi sint,  
ac tum, te infirmo potentes,  
quæ spes victoriæ?

Resiste, dum firmus es, & infirmus non  
timebis,

Ad illud præsto erit Angelus tuus,  
tot suis, per annos plures, obsequijs,  
de te optimè meritis, à te pessimè habitus:  
quod expectabis ab illo  
vitæ tuæ testimonium? quod salutis pa-  
trocinium?

Audi monentem vivus, & senties iuvamen  
Moriens.

Ad illud convenient Patroni tui,  
Si tamen

aut elegisti aliquos, aut aliquando coluisti:  
Quod si neglectum est, quis patrocinabitur?

Elige, quos libet, cole, ut decet.

Ad illud denique aderit Iudex tuus,  
qualis, heu! si offensus?

Et quomodo sustinebis offensum,  
Cujus, ipsis intolerabilior inferis offensu  
est?

Quo evades immensum?

Quomodo resistes Omnipotenti?

Quâ ratione fallas sapientissimum?

Ne Iudicem timeas, ut Patrem dilige.

Heu



Heu! *momentum!*  
Omni *tempore* potius,  
Totaque  
Si *felix* est, deprædicandum,  
Si *infelix*, deplorandum  
*æternitate.*

Quod ut *terrori* non sit, utere *tempore*;  
Vfurâ *temporis*,  
Fœnerare *momentum* unicum;  
*momento* unico,  
*æternitatem.*

### III.

*Discenda semper.*

Vnde verò,

Cum *mori*, nisi *semel*, nulli contingat?  
At *mortis* nihilominus *disciplina* est,  
Et *discitur mori*, & *docetur.*

DISCE A VITA,

1. Quæ quantumvis à *morte* abest longè,  
*Mortis* præludium est;

Quoque prorogatur diutius, hoc minuitur amplius:

Et quot annos numerat transactos,  
Totidem invenit sibi detractos,

*Mortì* adjectos.

2. Quæ die vix toto peracto, in suam  
sen-

*Enim quædam definit,  
Somnoque, mortis fratri, reficienda  
traditur,*

3. *Quæ infirmitatibus suis, morbisq; ob-  
noxia;*

*Cum consistere se credit, deducit,  
Et cum annos impofterum plures  
computat,*

*Mortalitatis suæ à mortis prodro-  
mis admonetur.*

4. *Quæ necessitatibus suis obligata,*

*Nisi paret, cum iubetur,  
Imperio mortis subjicitur:*

*Adeo à cibo, & petu,*

*Quibus vita alitur, mori discitur.*

5. *Quæ periculis ex omni aditu objecta,  
Mortem frequenter, ubi non timet,  
oppetit.*

#### DISCE IN VITA.

*Nulla mortalibus Scientia convenientior.*

*Quàm moriendi:*

*Quam qui fuissent olim consecuti, sapien-  
tes sunt habiti;*

*Quando Sapiencia nulla fuit credita su-  
blimior,*

*Quàm nôsse mori.*

*Quòd si iam mori, est desinere vivere,*

*Me-*

*Mori bene novit,*  
*Qui in vita bene novit desinere.*  
*Vt bene desinas, bene incipe,*  
*semper profice, constanter perface.*

*Id ut discas,*  
**ASSVESCE BONIS,**  
*Vivensq; tibi redde familiare,*  
*Quidquid exercere moriens voles.*  
*non aliter infirmitati tuæ prospexeris me-*  
*lius,*

*magna illa in vita est,*  
*in morte, multò maxima:*  
*Quando, quidquid usus non reddit facile,*  
*usurpatu erit difficile.*

### **I. COGITANDIS.**

*Occurret citò, quidquid cogitaveris cre-*  
*bro*  
*ac r. Ideam tibi aliquam Divinæ amabili-*  
*tatis*  
*ex infinita honorum ejus copia,*  
*Et inexhausta beneficiorum tibi præsti-*  
*torum*  
*ubertate forma.*

*Vide Sapientiam ejus, novos identidem*  
*tibi benefaciendi modos adinvenientem;*  
*Omnipotentiam, meris tui beneficijs occu-*  
*patam,*



Bonitatem tibi nunquam non benevo-  
lam;

Itaq; illam animo tuo imprime benignita-  
tem; ut levissimo in te suscitetur monitu,

Vt in spem erigat,  
ad amorem inflammet.

2. Pertracta frequenter tecum  
Terrenorum vilitatem; ut deferenda non  
crucient,

Cœlestium dignitatem; ut acquirenda ani-  
meret, aspice præsentis vitæ calamitatem:  
prospice infelicitatem alterius.

Cogita

Hospitij brevitatem; Patriæ æternitatem;  
Illius moras, huius solatijs demulce.

3. Prævide, quæ morituro sint eventura;  
ut cogitandi usu familiaria,

Expectentur animosius, sustineantur con-  
stantius, ac totam illam

decumbentis tui, ac morientis  
seriem evolve.

Et quibus tum voles indulgere cogitationi-  
bus,

usurpa sanus;  
quos experiri affectus,  
ad eos te exerce.

Eaque, quibus noles tum angi, iam amolire.

## II. AFFECTIBUS ORDINANDIS.

1. Timori imprimis:

Ne ita culpam aspiciat,  
ut veniam non speret.

Neq; ita poenam horreat,  
ut Christi meritis derogat.

Time ut filius, non ut servus.

Time ante mortem, ne timeas in morte.

Time ad poenitentiam, non ad desperationem.

2. Spei etiam,

Vt firmis nitatur fundamentis,  
unde nullus deturbet impetus,

Quæq; speras æternum, provideas temporis:

itaq; speres,

Vt, neq; tu spei, nec spes tibi desit;

Sperare enim velle, & spei nolle cooperari,  
non sperare, sed præsumere est.

3. *Amori* deinde,

Ne ita adhærescat ad creaturam,

Vt offendat Creatorem,

Neq; ita delectetur usurâ, ut crucietur jacturâ:

Ama,

Sed

Sed illum, qui amantem redamat,  
& amando felicem efficit,  
Quem amare non potes, & miser esse.

4. *Odio* item,

Vt culpam oderis, non personam:  
Et illam quidem ita, ut expiare studeas,  
non vindicare.

Oderis licèt, sed non, quod Deus amat,  
Ne in Divinum sis amorem iniurius;  
Sed neq; quod tu ipse beatè æternùm a-  
mabis.

Oderis, quod amari nunquam meretur,  
peccatum;

quod non odisse, est exitium suum amare,  
Peccatorem adeo non oderis, ut amare,  
etiam in vitam cogas naturam;

Ne assuetus odisse, desinas in odio,  
Filius iræ æternus.

5. *Gaudio* insuper,

Vt sit, non fucatum, sed sincerum;  
non de bono, quod mali causa est;  
Multò minimè de malo, quod bono inimi-  
cum:

Infeliciter gaudet, qui in luctu desinit.  
Gaude, quòd nomen tuum sit scriptum in  
libro vitæ.

6. *Tristitiâ* denique,

Vt



Vt nihil doleat, nisi  
aut conscientia mali, aut jactura boni;  
Cætera, si affligant, non deſiciant;  
meſura doloris, Dei offeſſa ſit,  
Cui placando dolere te volo, non angi,  
quidquid iuſto addis dolori,  
Tuâ, non Dei cauſa dolere, convinceris.

### III. BONIS AGENDIS.

Bene agis, quidquid cum virtutē agis.

Virtus eſt,

Quicquid actionis bonæ in bonum finem  
dirigitur,

Nihil ergo mali in bonum finem age,

Nihil boni ad finem malum,

Sed nec quod bene ſuſcepisti, malè proſe-  
quere,

Quicquid autem cœperis malè, fini bene.

Non potes non, quòad vivis, agere aliquid,

Debes autem nihil agere malè:

Vt bene agas omnia, attende ſingulis;

Et quod voles, vitam bene claudere,

Bene in vita exerce,

Virtutes maximè,

Sine quibus vivere, uti hominis non eſt,

cujus vitam à pecude virtutes ſecernunt,

ita mori ſine ijsdem, non eſt Chriſtiani;

utrumq; infeliciffimum.

Virtutes ut habeas familiares, frequenter  
exerce illo, qui infra ponetur, aut alio,  
quo libuerit modo.

#### IV. MALIS TOLERANDIS.

1. Animo nihil malum est præter peccatum,  
molestum est, quicquid contrarium est.  
Illud in te non feres ne momento quidem.

Hic solum laudis est, impatientem esse.  
In alijs feres, quod corrigas, aut si id non  
potes, condoleas.

Hoc ferre, virtutis est; vincere, felicitatis;  
moderari, cum vitio tuo accidit, æquitatis.  
providere, ne accadat, non naturæ, sed gra-  
tiæ,

2. Corpori quicquid molestum est,  
malum esse putatur.

Vtrunq; unde unde eveniat, ferendum est,  
tantò futurum gravius, quantò fertur ini-  
quiùs; tantò leuius, quantò toleratur faci-  
lius.

Disce ferre, quod dolet Vivo, ut feras,  
dolores *mortis*.

patiando *mori* discitur:

Vnde eveniat, quod pateris, parùm labora:  
evenisse, conscio Deo, satis est.

Ille si quid adversi immiserit; feres æquiùs,  
quia paternà à manu est:

Si quid permiserit, patere inferentem

Suspice permittentem:

Dei tui vicarius est,

Quisquis poenas illi debitas, à te exposcit:

Inimicus certè tuus non est; ad virtutem,  
rem optimam, te exercet:

Quam tu disciplinam si recusas, pessimus  
es discipulus:

Tu ipse si tibi molestus es, sustine,  
si culpâ tuâ, quia poena est.

Sin minus, ultro suscipe, quia meritum est.

*Desvesce malis,*

## I. COGITANDIS.

Coge ad examen cogitationes tuas,  
discerne vitiosas;

Vide, quæ ultro se ingerant, quæ accersan-  
tur,

quæ citius præstò sint, quæ frequentius re-  
deant,

quæ familiaris, quasi domesticæ sequantur,  
quæ blandius, velut amicæ, se insinuent.

Observa, quæ foris occasione, quæ intus  
motu suscitentur,

Cui maximè virtuti sint contrariæ,  
an contra Fidem dubiæ, contra Spem infir-  
mæ,

contra Charitatem malignæ,  
an contra Deum blasphemæ, aut impiæ,  
contra proximum iniquæ, de proximo si-  
nistre,  
circa te ipsum illicitæ.

Et si quas offenderis in consuetudinem du-  
ctas,

contra eas potissimum te muni.

Salutares primò, ijsq, contrarias substitue,  
occasiones deinde præclude,  
• habe in promptu, quo te occupes;  
prævide, quo declines.

Recipe te

Modò ad montem oliveti, aliàs ad Calvariæ;  
ibi sanguinem sudantem, hîc fundentem,  
vide Deum tuum,

Nunc in vulnera ejus sanctissima te abde,  
mox in sinum castissimæ ejus Matris.

Ascende nonnunquam ad gaudia Beatorum,  
aliquando descende ad tormenta damnato-  
rum:

Vide iterum, quàm breve sit gaudium  
Cogitationis, quàm longum supplicium:

## II. APPETENDIS.

Scrutare appetitiones tuas:

Alterum illud est in te malorum seminari-



nullum cuiquam earum vitium indulge,  
sed nec dissimula,  
quidquid senseris  
Aut inordinate appeti, aut immodicè de-  
clinari,  
ad mediocritatem voca;

vide

Quibus agiteris amoribus, quibus traharis  
desiderijs,

quæ te odia stimulent, quæ iræ inflammant,  
quos alas timores, quos spes nutrias;  
produnt ipsæ se,  
aut sine, in quem feruntur, aut modo,  
quo feruntur.

Et bene ferri possunt, & malè:  
si malè, desvesce,

Dum in naturam vitium nondum transit,  
neq; adhuc cupiditas, facta est necessitas.

Noveris,

quidquid extra virtutem appetis, vitium  
esse,

in virtute quicquid fugis, errorem esse,  
Ut bene appetas, rectè iudica, iuste pon-  
derz:

quod parvi facis, parùm desideras.

### III. AGENDIS.

Cita ad tribunal conscientiz,

Omne

Omnes tuas actiones:

à prima, mane, vigilia incipe, in somno  
define. tion es

Omnia tua studia, omnes percurre occupa-

Vide, quid Dei, quid tuâ, quid proximi  
gratiâ agas.

Quâ ratione te impendas devotioni, labori,  
Conversâtionì,

quid corpori tribuas, quid animæ.

Observe, quid cuiq; desit, quid redundet.

Actionis anima, honestas est, & bonitas,  
Ornamenta sunt, solertia, celeritas, assidui-  
tas,

vigilantia, attentio, conatus:

Sine honestate, vitam non habet actio,  
manetq; cadaver, quamcunq; ornes,

sine ornamentis, si vitam quidem habet,

Vigorem non habet, nec decorem.

Quidquid porro, aut mali agis, aut malè,  
quicquid ita agere assuevisti;

dediscendum est

Quodsi consuetudo te aut ignarum trahit,  
aut facilem ducit;

Habe, quo impetum sequentis tui frangas,  
obijce scopulos, ad quos allidas;

Inspice facti turpitudinem, poenam prospice,  
pa-

paratam impoſterum, à tergo ſequacem,  
Poſtquam verò ſtiteris, urgentem,  
pedem deinde refer, & in contrarium eni-  
tere,

quò ut facilem trahas animum,  
convince rationibus, promiſſis allice,  
præmijs demulce.

*Conſuetudinis porro*

Aut abolendæ, aut confirmandæ, ut aliqua  
quàm ſaquareis, via, ſit,  
ſic procede.

1. Agendum aliquid, aut prætermitten-  
ſiſſimè tecum ſtatue: dum,
2. Momenta utriusque, & argumenta in  
promptu habe.

iubet ſcilicet lex ſuprema,  
Confirmant ſapientùm teſtimonia;  
Monſtrant bonorum exempla;  
Svadet ſalus; ratio dictat,  
urget periculum:

Ne, cùm veſ agere bene, non poſſis,  
cùm nolis agere malè, agas tamen;  
idq; tùm,

Cùm ultimum, aut bene, aut malè ages.

3. Ex his æſtima, agendi & prætermitten-  
tendi,

parem neceſſitatem:

illius utilitatem, hujus perniciem,  
illius dignitatem, hujus turpitudinem.

4. Quod ut frequenter occurrat animo,  
Memoriale aliquod tibi statue,  
aut monitorem etiam aliquem constitue.  
5. Adverte ad agendi, aut omittendi diffi-  
cultatem,

Eamq; non actionis esse,  
aut omissionis noveris,  
sed voluntatis:

quæ si prompta est,  
Æquè facilè, aut sistet actio, aut sequetur:  
promptam ratio efficiet & meditatio.

6. Implora & de coelo gratiæ subsidium;  
quò naturæ malè propensæ flectat duritiem.

7. Profitere Deo tuo, te hoc agere, aut pa-  
illud fugere paratum.

quicquid minùs promptè fiat,

Non arbitrij esse, sed pravæ inclinationis.

8. Admove piam aliquam ipsi tibi violen-  
tiam,

& ad poenam aliquam te Deo tuo obliga,  
si ad numerum, quem tibi statues,

Aliquid, aut non agas, aut non omittas.

9. Admitte deniq; à conscientia tua mo-  
deratore

aliquam ad id obligationem,

quam



quam tibi in expiationem peccatorum  
imponat.

10. Designa tibi tempus aliquod, quo hoc  
tuum propositum excutias; & explora,  
quantum aut profeceris, aut defeceris.

## DISCE A MORTE MORI.

### 1. *Mors separat animam à corpore.*

Separa & tu à corpore animam, non mor-  
te, sed *mortificatione*,

Non contineat se angustis corporis limiti-  
bus animus tuus:

Non adhæreat illi vitioso affectu, cui con-  
iunctus est necessario naturæ nexu.

Separa ab illo cogitationes, abstrahè affe-  
ctiones,

Noli, quæ corporis sunt, amare nimis im-  
pensè;

noli desiderare nimis cupidè,

noli anxie nimis curare.

### 2. *Mors à charis omnibus arvellit.*

Præveni & tu mortem mortificatione,  
ut non rapiatur inordinatè,  
non adhærescat vitiosè:

Ama non tuâ, sed Dei tui gratiâ;

Non quia placet tibi forma corporis,  
Sed quia in anima resplendet imago Dei.

### 3. *Mors*

3. *Mors adimit omnia fortune bona.*

Id ne sine quæstu tuo accidat,

Mortem tempori præoccupat,

eaq; præmitte eò,

ubi perpetuâ eorum usurâ es fruiturus.

Divide cum indigentibus;

Expende in usum salutis tuæ, & cultum Dei.

Neve id cum dolore tuo eveniat,

Abstrahe affectum ab illis, quæ habes;

Aut si non habes, appetitum cohibe.

4. *Mors doloribus discruciat.*

Vt feras dolores mortis, assuesce molestijs  
vitæ,

nec contentus ferre oblatas, accersere ultro,

morere corpori, per spontaneas afflictiones,

morere sensibus, per eorum abnegationes,

Laboribus te exerce, para doloribus,

Mors ferit mitius, quo minus habet, quod  
lædat.

5. *Mors delicias omnes & delecta-  
tiones*

*subtrahit.*

Non senties earum iacturam moriens,

Si vivus ijs carere didiceris;

Sed & facîle repudiabis carnis,

Si gustaveris oblectationes spiritûs:

non æstimabis caducas,  
si respexeris æternas.

6. *Mors angit* futurorum ignoratione,  
præteritorum recordatione,  
præsentium horrore,

Disce mori, spem compara, ut non an-  
gant futura:

Pœnitentiam usurpa,  
ut non crucient præterita;

Culpas in te dilue, poenas à te exige.

Præsentibus te para: acquire amicos,  
qui non destituant: delige Patronos,  
qui succurrant.

7. *Mors vitæ & gratiæ tempus claudit:*  
tu certa cum velocissimò  
Et quod sistere non potes,  
in cursu intercipe;

usurpa de illo, quicquid concessum est,  
nec secuturum aliquid tibi promitte.

Diem omnem transige, ut ultimum,

Horam optimam, ut supremam,

Nec, ut speres, quod incertum est,  
certi aliquid dimitte.

8. *Mors* supremo sistet Iudici,  
Mortem præveni; siste illi te quotidie,  
quem semel Iudicem habiturus es,  
prælude etiam iudicio illi in vita,

Eri-

Erige tribunal in corde tuo,  
Testem accerse conscientiam,  
Cogitata, dicta, facta eodem cita:  
Tu ipse reus, iudex, vindex esto,  
Neque, quod nolis sustinere post mortem,  
in vita dissimula.

9. *Mors* aufert è tempore & transcribit æternitati:

Imitare & tu mortem vivus,  
ac degens in tempore,  
confidera æternitatem,  
sed & aufer tempus cogitationibus vanis,  
verbis otiosis, cogitationibus inanibus,  
ac melioribus consecra;  
lis scilicet, quæ egisse in tempore,  
gaudebis in æternitate.

10. *Mors* denique,  
quod in te vivo non potest,  
in proximo mortuo tibi exhibet.  
Disce mori, si non in te, qui vivus es,  
saltem in altero,  
Quem è vivo tui simili mortuum vides,  
& quod in illo vides certum,  
in te dubium non puta.

**DISCE QUOTIDIE MORI.**

Dirige ad mortem dies singulos,  
& mane incipe,

pro-



procede per diem,  
tanquam vesperi moriturus.  
ac 1. Simul atq; experrectus à somno fue-  
ris,

mortalem te cogita, est,  
Adeoq; certò moriturum, quàm certum  
non fallere veritatem, non errare Fidem.  
Mortuos non vivere:

Plures eà nocte mortuos,  
plures eo die morituros, te.  
te ad meliorem diei istius frugem supersti-

2. Pete à Deo vitæ & mortis Domino,  
ita diem istum transigere,  
ut si ultimus esset,

atq; ut transactum fuisse in morte volēs.

*O suprema vitæ mortisq; Domine!  
scio me mortalem, credo me mori-  
turum: Tu dona gratiam, ita vi-  
vendi, ut mori non timeam; ita mo-  
riendi, ut æternùm vivam.*

3. Missæ sacrificium, cogita mortui pro  
te Christi monumentum,  
quem dum mortuum credis, moriturum  
te non dubitabis,  
ac per illius mortem,

Salutarem moriendi horam rogabis;  
eoq; ante mortem, corpore refici, quod  
pro te nôsti in ara immolari.

4. Venerare peculiariter Patronos,  
quos vitæ mortisq; singulares tibi,  
in omnes diei horas elegisti:  
& ut morituro assistant, roga,  
nominatim illos,  
qui & morienti in cruce IESV,  
& in lectulo, Matri ejus Mariæ astiterunt.

5. Ad horas omnes,  
renova mortis memoriam.  
& cogita, tantò te illi esse propinquiorem:  
poteris illud ad clausulam salutationis An-  
gelicæ.

6. Si quid molesti accidat, aut operosum,  
præludium mortis cogita;  
& disce mori à mortificatione.

7. Morituris, si ita res tulerit, assiste;  
Et in eis mortalitatem tuam contemplare.

8. Dum corpori vacas curando, escam te  
vermibus puta sagine: hoc lautiolem,  
quò curas impensius.

9. Vivus quandoq; sepulchrum per co-  
gitationem ingredi, &  
& qualis illic futurus sis,

observa: ac intra cutem tuam ossa, mortua-  
lium

lium simillima intueri.

10. A die transacto, cæterorum cape argumentum, annosque, quos vixisti, ad calculos revoca; quare, quot sis deinceps victurus;

Et audi, illud: stulte! hac nocte, &c.

Et quâ horâ, non putas, &c.

11. Conscientiam tuam ante somnum inspice,

& pensa, eamne offerre morti audeas? actum rationes ejus ita compone, ut si non esses supervicturus:

12. Cum cubitum secedis, & ad lectum te comparas, aliquem, eo in opere mortis processum cogita, nec aliter te lectulo atq; lectulo imponendum,

Solo ex omnibus facultatibus tuis linteo coopertum:

Ac tum, veluti crastinum non habiturus, Testamentum tuum conde:

Hæredesq; tuos, IESVM scribe & MARIAM,

ut verò dormias sùavius,  
moriturus securius,

inter IESVM & MARIAM, Angelum tuum & Iosephum te colloca:

quos inter mori optabis.

VIR.

# V I R T U T E S,

*Frequenter per vitam usurpanda, ut  
morituro sint familiares,*

Quando, quicquid in consuetu-  
dinem vitæ non transiverit, o-  
perosum erit, exercere,

*Has tu aut harum similes, si non va-  
cat quotidie, singulis minimum  
hebdomadis semel usurpa.*

# F I D E S.



Deus Veritas! quanto tuo bene-  
ficio inter tot errantes in tenebris  
gentium myriades, ego illustratus  
Fidei lumine, video & credo!

O Veritas! reverbero in te lumen illud,  
& credo, quicquid unquam revelâsti, ac  
per Ecclesiam Sponsam tuam, Matrem  
meam, credendum proposuisti.

Submitto tibi captivum intellectum me-  
um, & quicquid de te non capio, per te  
credo quicquid non intelligo, humiliter  
amplector, firmissimèq; teneo.

Te trinum, esse & unum; Deum & Ho-  
minem



minem; Creatorem, & Conservatorem; Redemptorem & Iustificatorem: Testem & Iudicem; Vindicem & Remuneratorem.

Infinitem sapientem, ut nihil ignores,

Omnipotentem, ut omnia possis,

Optimum, ut omnia communices,

Misericordem, ut parcas poenitenti,

Iustum, ut damnes reum:

Veracem, ut non fallas; Simplicem, ut non mutes; Authorem boni omnis, quicquid in praesens habeo, & spero impofterum, ac quicquid brevissimo tempore ago boni, æternis te præmijs compensaturum: quicquid momento unico ago mali, æternis te supplicijs vindicaturum.

Et in hac Fide per gratiam tuam opto vivere, spero mori.

Ac contra errores omnes, ab ea alienos protestor.

Tu, ô Veritas! Lumen hoc in me auge, in alijs te ignorantibus accende:

Et da, ut in eo, per semitas Iustitiæ unanimiter omnes ad felicem ambulemus æternitatem.

C

SPES

# S P E S.

**O** Deus Fidelitas! quanto iterum tuo beneficio, tot inter desperatos, ego promissis tuis fretus, sperare non desino.

lacto in te, quam habeo à te, spem meam: promissisti mihi poenitenti veniam, supplicanti gratiam, perseveranti gloriam, consilium in dubijs, solatium in adversis, subsidium in periculis.

Eccc amplector toto sinu spei meæ promissa tua, & certus sum, si sperare non desiero, promissis te non defuturum.

Tametsi ergo tentet diabolus, stimulet cupiditas, blandiatur mundus, mors minetur, & omnia in me coniuvent elementa, non timebo mala, quoniam tu mecum es.

Quid enim timeam, quando tu me protegis, qui es omnipotens, qui me infinitis amplius studes servare, quam omnes mei adversarij perdere?

Quid contrister? quantumvis destituatur viribus corporis per infirmitates, animi solatijs per afflictiones, vitæ subsidijs per egestatem, hominum adiumentis, per orbitatem, quoad tu me non destituis, in quo solo invenio omnia?

Quid

Quid non sperem ab Omnipotentia, cui nihil est difficile; à Sapiaientia, cui nihil incognitum; à Bonitate, cui nihil molestum? quæ quicquid vult potest; quicquid promittit, præstat: & liberalius etiam, quàm ego sperem; cupidius, quàm ego desiderem?

Quid non expectem ab eo, qui dedit non rogatus, illum, quo nihil habuit charius, Filium suum?

Qui, ne vacillet spes mea, obligavit mihi suam Divinam Fidelitatem; promissa firmavit sanguine, corpus suum oppignoravit?

O Deus spei meæ: quid non speret amicus tuus, qui etiam inimicis tuis promittis omnia?

Quem rejicias ad te conversum, qui etiam à te aversum invitas, sollicitas, & passis brachijs expectas?

Spero veniam, pro quo interpellat innocens sanguis Filij tui.

Spero vitam, pro quo in mortem author vitæ Filius tuus dedit animam suam.

Spero salutem, pro quo video laborare Omnipotentem Filium tuum usque ad mortem.

O IESV spes mea! tanta est Bonitas tua,  
ut in ea, etiam pessimus sperem.

Tanta est Beneficentia tua, ut meritò in  
eam, etiam ingratus sperem:

Tanta est misericordia tua; ut, quò ego  
sum inferior, hoc amplius de te sperem:

Esto ergo, peccator ego sim; tu meus  
Fide-Iussor es.

Ingratus ego sim: gratia tua omnem me-  
am excedit ingratitudinem.

Indignus ego sim: excellentia tua om-  
nem meam superat indignitatem:

Miser ego sim; maior est misericordia tua.

Merita mea nulla sunt, tua infinita sunt.  
Agè, ergo anima mea! spera in Deo tuo:  
Erigere de terrenis, exurge ad coelestia:  
Desere caduca, spera æterna: Renuncia  
hospitio, ad Patriam anhela. Tibi condi-  
tum est pulcherrimum illud cœli Palati-  
um: Consortes tui erunt Angeli. Amici  
tui Beati. Beatitudo tua Deus: Tu bea-  
tus æternùm.

## CHARITAS DEI.

O Deus Bonitas! quanto amore meo  
dignus es, qui, cùm te tot damnati  
oderint, non ament tot reprobi, a-

mari

mari à me velis, & amore meo me facere  
beatum!

Amo itaq; te ex toto corde meo,

In te amabilissimum, quia Deus es: Cujus natura Bonitas est. Cujus intellectus Sapientia est: Cujus voluntas, Amor est; cujus forma pulchritudo est: Cujus Potestas Omnipotentia est: Cujus vita beatitudo est: Cujus locus, Immenfitas est Cujus tempus Æternitas est.

Amo te ex toto corde meo,

Extra te, amabilissimum, quia Deus meus es, ubiq; tui erga me amoris imprimens vestigia: quocunq; enim me verto, amorem video: quicquid de te cogito, angustiam invenio.

Æternitatem confidero? inde usq; è tot reprobis feligis me. Tempus cogito? è nihilo condis me, & in tempore quidem, quot modis amabilis es?

Quàm amabilis Creator es, qui solius ductu amoris ad Imaginem tuam creas me; & totum mundum propter me!

Quàm amabilis Conservator es, qui non minore amore me conservas, & mecum, ac propter me cætera omnia!

Quàm amabilis Redemptor es, qui tam



admirabili amoris prodigio, perditum me  
fangvine tuo reparas!

Quam amabilis Sanctificator es, qui tam  
gratuito amoris beneficio, vitâ gratiæ me  
donas!

Quàm amabilis Protector es, cujus A-  
mor è tot periculis toties me eripuit!

Quàm amabilis Rex es, qui amoris tui  
Divinâ munificentîâ in partem Regni tui  
me admittis!

Quàm amabilis Dominus es, qui amore  
fervi captus, ad solium gloriæ tuæ me e-  
vehis!

Quàm amabilis Pater es, qui degenerem  
filiûm, victus amore, in gratiam toties re-  
cipis!

Quàm amabilis Sponsus es, qui amore  
tuo post tam foeda, toties iterata divortia,  
me dignaris!

Quàm amabilis Iudex es, qui amore tuo  
mitigatus, tot annis sententiam differens,  
ad poenitentiam me expectas!

Toties amabilem, tot modis amantem  
me, amo ex corde, ô Deus! illudq; per a-  
morem tuum, cui negare nihil potes, ex  
amore rogo, ut quæcunq; ex amore mei  
creâsti, sint amoris mei adiumenta: quæ-  
cunq;

cunq; in carne pro me assumpta ex amore fecisti, aut sustinuisti, sint amoris mei fomenta; quæcunq; in coelis promissisti, sint amoris mei nutrimenta: donesq; me amare te super omnia, deniq; in amore vivere, & ex amore mori.

## CHARITAS PROXIMI.

**O** Deus! non in te solum, sed in tuis omnibus amabilissime, amare te non possum, & proximum meum, Imaginem tuam, odisse; sed nec amare perfectè, & proximum etiam inimicum non amare.

Amo itaq; ex corde omnes communis conditionis vinculo mihi copulatos: Amicos pariter & inimicos propter te amo, cujus gerunt imaginem per naturam, similitudinem per gratiam; in quo solo sunt amabiles; extra quem si amantur, vitiosè amantur.

Amo eos, quia & mandato tuo amare præcipis, & exemplo tuo amare doces: Amasti verò ita ab æterno, ut in tempore creâris ex nihilo: amare etiam æternum paratus es, modò ne amore tuo se præstent indignos.

Amo.

Amo illos, & quicquid in illis tuum est: detestor verò, quicquid in illis non tuum, sed alienum est, quale solum & unicum peccatum est: quod etsi tuo illos amore indignos reddit, nihilominus reddit obnoxios: quia uti amare culpam non possum, ita odisse personam non debeo.

Amo illos, & semel amatos æternum amare desidero; quo amore meo ut digni sint, optare ego possum, tu solus præstare.

Vt verò etiam amare me probe impoterum, amorem illum conceptum corde, testabor ore. Conciliabo mihi offensos, & offensam, si quæ ab ijs venit, excusabo; vitij quicquid notâro, si licet, emendabo; verbulo certè nullo exasperabo: Opere etiam probabo, amoliarq; ab ijs, quicquid verè malum videro. Conabor verò, quicquid salutare corpori animæq; cognôro, omni ope, industriaq; mea procurare. Ver tam in partem meliorem, quicquid finistrum occurrerit: non reddam certè, finistrè iudicando deterius.

Cui quidem amoris meo, quicquid mihi aut ab alijs contrarium fuerit illatum, aut ab affectu meo mihi suggestum, iam nunc detestor. Et hunc amoris mei erga omnes  
pro-

pro miscuè sensum, uti te teste profiteor,  
ita te adiutore, retinebo, speroq; in isto a-  
more & vitam agere & mortem obire.

## CONTRITIO.

**E**Cce mi Deus! advolvor ad thronum  
misericordiæ tuæ reus & supplex, ro-  
goq; te per omnes tuas miserationes:

Per æternum tuum erga me amorem, per  
susceptos in carne nostra pro me labores.

Per internos, gravissimosq; pro peccatis  
meis animi tui angores & dolores.

Per omnes corporis tui cruciatus, in Pas-  
sione, Cruce, & morte, toleratos.

Per accepta pro me vulnera, & fœsum  
copiosissimè sanguinem.

Per omnes irrogatas nomini tuo igno-  
minias.

Per omnia vitæ & mortis tuæ merita.

Per merita item Virginis Matris tuæ, An-  
geli mei Tutelaris, Patronorum meorum ac  
Sanctorum omnium: eorumq; & Electorum  
omnium suffragia.

Respice illis me oculis, quibus Petrum  
te negantem, Paulum persequentem, Mat-  
thæum in telonio sedentem, Magdalenam  
ad pedes tuos iacentem, Latronem in Cru-

ce

ce pendentem respexisti: & præsta veniam, quam non merui; gratiam, quam perdidi; misericordiam, quam neglexi.

Doleo de te offensus, tam amabili Deo meo, quem amo ex intimo corde, & amare æternum desidero, ac

Detestor omnia peccata mea, negligentias, ingrattitudines, & imperfectiones: & quicquid unquam contra infinitam tuam Maieftatem cogitatione, verbo, opere, & omiffione deliqui.

Eia mi Salvator! memento nomen tuum, & falva me perditum.

Si magna funt, quæ commifi; maior eft Bonitas tua, cui fupplico.

Si magna funt mea debita; maiora funt tua merita.

Quomodo non recipies ad te converfum, qui à te averfum invitasti ex amore, quæfivisti cum dolore.

Quomodo rejicies miferum, qui es Filius Patris mifericordiarum.

Quomodo destitues desolatum, qui es Deus totius consolationis.

Quomodo non parces supplici, qui pro reo mortuus es.

Eia Pater, respice Filium, memento illum



lum non pro te, sed pro me, non pro suis,  
sed pro meis peccatis esse mortuum.

Potuiue ego plus te offendere, quàm ille  
te placare.

Quòd si inire rationes mecum velit Iusti-  
tia tua, ecce offero thesauros Filij tui, in-  
finities debitis meis maiores.

Si minus ille pro me præstitit, quàm ego  
contra peccavi, utere in me iure tuo.

At minùs ego possum offendere, quàm  
ille placare; minùs ego mereri, quàm ille  
sustinuit.

Ecce Pater, in Filio tuo lytrum meum,  
ecce è vulneribus ejus, è manibus, pedi-  
bus, latere stillat, quod offero!

Respice Pater Filium unigenitum, & re-  
cipe adoptivum.

## RESIGNATIO.

**O** Supreme rerum omnium Domine!  
non mea, sed tua voluntas in me &  
per me fiat, in tempore & æter-  
nitate.

Satis meus fui, qui tuus esse debui: satis  
diu in te iniurius, quia in me benignus.

Vsurpavi me mihi, qui sum obligatus ti-  
bi: abusus me ipso sum mancipio tuo; ani-

mâ meâ tui imagine; intellectu meo veritatis tuæ speculo: voluntate amoris reâ; memoriâ, beneficentiæ tuæ teste; sensibus deniq; obsequij tui ministris,

Detestor tandem iniquam hanc meam proprietatem, ac ne momento quidem deinceps ullo quidquam, ut meum retinere statuo:

Sed totus qui sum, in ius tuum transeo, meq; & omnia mea tibi resigno; ac Divino tuo beneplacito omnino permitto, offeroque.

Corpus in victimam, cor in templum, vitam in holocaustum, vires omnes & facultates in beneplaciti tui obsequium.

Statue de me quicquid tibi placuerit, cui placere non potest, nisi salus mea.

Vtere me, velut re tuâ, meis omnibus, famâ, vitâ, fortunis, corpore, animâ, ad arbitrium tuum.

Nunquam tua circa me voluntas ab æterno, nisi optima fuit; nunquam deinceps erit alia.

Nunquam mea hæcenus bona fuit, nec esse potest, nisi tuæ conformis.

Quicquid ergo de me decrevisti in æternitate, in tempore exequere.

Sanum vis? sanitatem tibi impendam:  
Vis ægrum? ægritudinem: Vis pauperem?  
paupertatem: Vis opulentum? opulenti-  
am: Vis felicem? felicitatem. Vis misce-  
rum? miseriam.

Id unicum modò tuis in me adde bene-  
ficijs, ut nihil mihi placeat, quod tibi dis-  
plicet, nihil mihi displiceat, quod pla-  
cet tibi.

## GRATITUDO.

**H**eu! ingratitude mea pessima, Opti-  
me & Benignissime Deus! æternis  
tibi beneficijs sum obligatus; & nul-  
lo momento temporis, ut debui, grātus  
fui. Tota vita mea purissimum est donum  
tuum, omniaq; vitæ meæ momenta, merissi-  
ma beneficia tua; & plena sunt omnia in-  
gratitudinis meæ.

Benefactorem te agnovi, & non colui:  
beneficia non æstimavi, ut debui; non u-  
surpavi, ut potui; non detuli gratias, quas  
expectabas; non reddidi usuras, quas exi-  
gebas.

Vtinam! o Benefactor meus, liceret ad  
hoc punctum totam vitam meam revoca-  
re; & quicquid neglectum est, compensare.

Vti-

Vtinam liceret beneficia tua æstimare  
suo pretio! gratias referre pro merito: me  
ipsum reddere pro obsequio.

O Deus! agnosco beneficentiam tuam,  
& obligationem meam: te Benefactorem,  
& me debitorem: te liberalissimum in da-  
ianno, me parcissimum in compensando, in-  
gratissimum in usurpando.

Agnosco te Conditorem meum, me fig-  
mentum tuum. Te Salvatorem, me perdi-  
tum: te Iustificatorem, me iniustum: te  
Protectorem, me infirmum.

Creâsti me ad imaginem & similitudi-  
nem tuam, ad gloriam tuam, & salutem  
meam.

Conservâsti me hætenus, tantis universi  
impensis & propter me omnia.

Redemisti me à morte æterna, ad vitam  
æternam, vitâ & morte Vnigeniti tui.

Illuminâsti me Fide tuâ, ne à te sine meo  
aberrarem.

Iustificâsti me toties gratiâ tuâ indi-  
gnum, & in amicitiam tuam me restituiisti.

Pepercisti mihi toties damnationis reo,  
& in spem salutis me revocâsti.

Subduxisti me tot peccandi occasioni-  
bus, & in securitatem è tot periculis me  
asseruisti.

Li-

Liberâsti me à tot malis, quæ evenire mihi poterant. Suppeditâsti mihi plurima ad salutem media: pro quibus omnibus cum non habeam quod rependam, nisi unicum amorem.

Amo te Benefactorem meum ex toto corde meo, & in compensationem beneficiorum tuorum offero tibi omnia Filij tui merita: unumq, illud per eadem humillimè rogo, uti, cui vivo optimè voluisti & fecisti, morituum Divinâ tuâ beneficentiâ non dedigneris.

## ABNEGATIO sui, &c.

**O** Deus! unicum & summum Bonum meum, totus ac solus thesaurus meus! in quo omne meum quiescit desiderium, à quo omne votum meum expletur.

Vtinam fiat verum in me illud veritatis tuæ oraculum! *Vbi est thesaurus tuus, ibi est & cor tuum:*

Vtinam affectus meus per creatas Bonitatis tuæ umbras vagè diffusus, tibi aliquando adhærescat!

Vtinam nihil extra te, nisi propter te concupiscat! Ecce mi Deus abnego me ipsum



psum; ut te retineam: renuncio omnibus,  
ut in te omnia inveniam.

Trado me tibi, ad quem omni iure pertineo: & quidquid à te ad usum habeo, sponte reddo; non usus, nisi ad placitum tuum.

Protestor etiam contra omnes rerum delectabilium fallaces illecebras, contraq; omnes cupiditatum stimulos & vitiosas ad cætera inclinationes.

Quæq; amare non possum sine cœlestium fastidio, neq; usurpare sine offensa tua te teste repudio.

Et quæ transitorium me ad æternitatem relinquitura sunt, ultrò relinquo.

Infirmittatis tamen meæ conscius, peto à te per merita Filij tui gratiam tuam, ut me eorum usus, quibus carere non possum, non seducat, neq; eorum affectus cor meum à te abstrahat, tum maximè, cum morti vicinus tibi sistar, terreis omnibus æternum separandus.

## PATIENTIA.

**P**atientissime Deus, erubesco meritò impatientiam meam: dum cogito Patientiam tuam: pudet me ignaviæ

meæ, qui tot annorum disciplinâ te Magistro ad Patientiam non erudior: qui pati cogor & pati non disco: pati enim iubeor, dum vitam ingredior: pati mereor, dum peccare non desino: vivere non possum, quin pati debeam: salvus non ero, nisi per patientiam.

Quando tandem tot obligatus ad patientium debitis, tantis ad illud ipsum invitatus præmijs, tot instructus exemplis, patiar, quæ pati me non odio, sed amore iubes?

Quando patiar lubens cum usura, quæ nolens cum damno meo patior? heu infelicem me patientem! qui ita patior, ut patiundo amplius pati merear; dum, quæ iniuste patior, iniuste detestor.

Pati ego tot titulis mereor, quot peccatorum me à prima ætate reum, conscientia mea arguit: pati mereor, non modò quidquid evenire molesti, adversi, iniqui potest in terris, sed ipsos insuper inferos, idq; toties, quoties te graviter offendi, quoties autem (heu) non offendi?

Et talia quidem promeritus, levissimam manûs Paternæ dedignor correctionem, querorque! heu! famem pati æternam dignus sum: & indignor, si quid minus ad

appetitum meum temperatum apponitur!

Calumnias mortalium omnium, damnatorum æternas fannas; rerum à Deo conditarum omnium exprobrationes sum meritus; & verbulum amici iocantis, admonitionem Prælati arguentis non fero.

Egestatem extremam, ac rerum omnium penuriam promerui; & stomachor, dum re minimâ carendum est.

Societatem damnatorum æternam sum meritus: & molestè fero mores fratrum, defectus naturæ inculpabiles.

Pœnas inter damnatos sempiternas iam pridem sustinere me oportebat, & tam iniquè patiots brevem aliquam corporis afflictionem, aut animi molestiam.

Et quid mihi æternos dolores promerito, diuturnum in tempore quantumvis molestum videri possit?

Tu insuper Benignissime Deus, ad hæc debita mea addis præmia tua: & liberalissimis patientiam meam promissis sustentas; lactasq; eam, ac mulces æternis cœli gaudijs. Polliceris bona tua omnia, atq; adeo te ipsum illi in præmium eâ solum lege, ut paululum tollerem; & hoc molestum sit.

Heu! quanta & quoties passus non sum,

ut

ut vacarem vitijs, indulgerem concupiscen-  
tijs, placerem hominibus, potirer desi-  
deratis!

Heu! quid non patiuntur improbi, ut  
supplicia mereantur æterna! Et ego pio ze-  
lo non feram, quæ mihi Deus meus im-  
miserit!

Vt verò etiam exempla non desint, quæ  
ad patiendum me sollicitent; tu ipse tot an-  
nis toleras me, heu qualem! quot peccatis,  
cupiditatibus, vitijs, imperfectionibus ple-  
num, toleras tamen & expectas, dum re-  
suscipiscam!

Tu Deus meus, in me, & à me sustines,  
quæ nullus unquam homo ab homine sus-  
stinuit. Et à me quidem, quem tantis be-  
neficijs afficis, quem è fordibus extractum,  
ad tantam dignitatem evehis, quem inter  
cœli hæredes, & Regni tui consortes ad-  
mittis.

Et quasi partim illud esset, hominem in-  
duis, & humana in carne hominum omni-  
um portas dolores. Eaquæ; pateris, quæ co-  
gitare malignitas, quæ infligere inhumana-  
ritas potuit; quæquæ; pati, nisi Deus Homo  
non posset.

Sustinet me Angelus meus, & tanta in

me tamq; indigna: Angelus tantò me nobi-  
lior, tam bene de me meritus; & perseve-  
rat tamen mihi benefacere.

Sustinet me Mater mea, & tanta Mater,  
cujus primogenitus Deus est: sustinent  
me Beati omnes.

Sustinent, quotquot nôrunt, aut vident  
me. Et tanta in me sterilia sint exempla?

Video insuper, amoris tui tesseram esse  
patientiam; & quò quisq; tibi carior est,  
hoc amplius pati.

Novi deniq; usuram patientiæ gratiam  
esse, dotem ejus Patrem, cœlum hæredita-  
tem. Et pati adhuc recusam, inò verò  
pati, patiēda omnia non desiderem?

Ecce mi Deus! paratum me iam tandem  
aliquando ad plagas tuas: cæde, punge,  
tunde, crucia, feram per gratiam tuam:  
meo merito, tuis promissis, tuo, omniumq;  
exemplo doctus. Tu, ô Deus! hîc cæde, ut  
parcas æternum.

## P E T I T I O.

**B**Enignissime Deus! animat me veritas  
tua, ut audeam à te petere, quod non  
mereor à te impetrare.

Novi enim teneri te sponsione tuâ, ni-  
hilq;



hilq; negaturum, quidquid petiero.

Experior urgeri me necessitate meâ, cui aliunde, nisi per te satisfieri non potest.

Novi velle te rogari, quod dare desideras; nec tam impensè ac crebrò posse me rogare, quin tu cupidinis ac frequentius exspectes dare.

Novi perspectas tibi esse omnes meas necessitates, & infirmitates, misérias omnes, & molestias.

Novi parata te habere subsidia, id solum deesse, ut rogem.

Eja ergo rogo te per omnes tuas miserationes, da mihi, quod Filius tuus pretio sanguinis sui mihi comparavit: quod dare tibi facilè est, & honorificum; quod impetrare, mihi necessarium & salutare.

Da, ut verum concipiam de peccatis meis dolorem, agam poenitentiam, poenas expiem.

Da, ut in Fide constans, in Spe firmus, in Charitate fervens perseverem.

Da, ut tuum in me adimpleatur beneplacitum; tua in me beneficia non sint frustranea.

Da, ut patienter feram, quidquid mihi adversi aut molesti venerit: dignum me  
omni

omni molestiâ humiliter sentiam.

Da denique, ut in te vivam per gratiam;  
de te per Sacramentum; tecum per glori-  
am: Moriarq; filius gratiæ, Viatico cor-  
poris tui munitus, hæres salutis, Amen.

*A F F E C T V S*  
**SANCTÆ COM-  
MUNIONIS.**

**D**Ulcissime IESV! Panis viventium,  
Viaticum in Domino morientium,  
quem in Venerabili Sacramento  
præsentem confiteor, & Deum meum vene-  
ror, sine quo vivere non possum, mori  
non spero.

Ecce pando tibi sinum cordis mei, & pa-  
ratum offero totum animi mei habitacu-  
lum: dignare ad me venire, & mecum ad  
finem usq; vitæ manere.

Et qui te non roganti offers, ad te an-  
helantem non despice. Obsecro te mi IESV  
per illum ipsum amorem, quo te mihi  
in cibum communicas, & per istud amoris  
Sacramentum, istam mihi ex hoc gratia-  
rum fonte præsta gratiam, ut illo corporis  
tui Sacratissimo Cibo dignè reficiar in vi-

ta, piè in morte: eoq; refectus, fastidiam  
omnes terræ delicias, & carnis voluptates,  
tecumq; vivam in tempore, quoad in te vi-  
vam æternum.

Vt eodem confortatus, viam ingrediar  
universæ carnis, sistarq; iudicio tuo, non  
damnandus ad mortem, sed salvandus ad  
vitam, in qua te summo bono meo beatè  
fruar æternum.

O mi IESV! tu tulisti in corpore tuo  
quidquid ego peccavi in me: tu abluisti  
sanguine tuo, quidquid ego deliqui in cor-  
de meo. Per illud ipsum corpus, per san-  
guinem istum supplico, absterge à me  
quidquid reperies in me, quando Viatico  
isto corporis tui reficies me transiturum  
ad æternitatem.

Et quod tunc fortassis non potero, iam  
rogo per Divinum tuum erga me amorem;  
& per hoc amoris Sacramentum; ut ulti-  
mum meum sit suspirium:

Deus abscondite, & Salvator, salva me,  
ut ultimum meum sit desiderium in Viati-  
cum mortis sumere te: ut ultimum meum  
sit solatium, tecum per Sacramentum cor-  
poris tui uniri: ut ultimum meum sit votū:

In manus tuas tradere spiritum meum,  
ut

ut ultimum vitæ meæ punctum terminetur amore, Amen.

*DEVOTIO*  
*In varias Supplicationes digesta.*

**I. AD DEUM  
PATREM.**

**O** Pater misericordiarum, & Deus totius consolationis, indignus quidem ego sum isto te nomine appellare; qui misericordiam non merui, sed iustitiam; non consolationem, sed castigationem, dignus tamen es isto à me nomine honorari. At quæ tua misericordia, si mea defuit miseria? quomodo tu Consolator, si ego non sum afflictus?

Eja ergo mi Pater! miseris mea est, quæ te facit misericordem; afflictio mea te Consolatorem; agnosco me miserum, ostende te misericordem; afflictum me fateor, Consolatorem te testare. Ego quidem ut miser sim, à me habeo; ut sim afflictus, mihi met imputo; tu verò, ut miserearis, ut consol-  
leris

leris, non mea te miseria, aut afflictio, sed tua te movet miseratio & dignatio.

Miserere ergo mei, tum, quando in me cum morte miseriæ simul omnes incumbent; ac tum solare, cum desolatio me suprema occupabit.

Quo in agone ostende te Patrem, & succurre filio.

## II. AD FILIUM.

**O** IESV misericordissime! quia Filius Patris misericordiarum; qui, ut misereri posses promptius, miser factus es; miserasq; nostras nascendo suscepisti, vivendo expertus es, moriendo expiasti.

Ego te post Patrem, miseriæ omnium plenissimus, humiliter appello, & demissè supplico per omnes tuas, pro me toleratas miseras, & usurpatis in me miserationes; ut miseras omnes, peccatorum meorum iustissimum debitum admittas in miseriæ tuarum sanctissimum commercium:

Faciasque, quæ in poenam irrogas; in meritum transire, & ad præmium computari:

Mortem verò, miseriæ mearum in vi-

ta



ta præsente ultimam, quam obire communis iubet necessitas, obire feliciter tua præstet benignitas; eamq; mihi esse miseriarum omnium terminum, & honorum omnium principium:

Idq; ut sperem, facit infinitum, per quod spero, mortis tuæ pretium; quæ uti mortem sempiternam sustulit, ita vitam æternam conferat.

### III. AD EUNDEM CRUCIFIXUM.

**O** IESV CRVCIFIXE! quàm sublimis in sinu Patris, tam humilis in brachijs Matris, brachijs Crucis, Matris Synagogæ.

Quàm gloriosus in coelis, tam abjectus in terris.

Quàm à te beatus, tam à me miser.

Quàm splendidus in pauidamento Majestatis tuæ, tam sordidus in lacerna vilitatis nostræ.

Credo te Deum in Humanitate, & Hominem in Deitate, etiam sub spinis faucium, à vulneribus cruentum.

Spero in te, supra me exaltatum per Deitatem

tatem, ad me usq; exinanitum per Humanitatem.

Et spero à te, quidquid pretio sanguinis tui comparasti pro me.

Amo te amabilem mihi, quia creatione Imago tua sum: amabiliorem, quia dignatione Imago mea es.

Rogo te in ista Fide, per Spem illam, ex eo amore adde istud tuis in me beneficijs:

Vt, quem in communionem calicis tui, in Crucis tuæ consortium, in dolorum, partem iubes venire, dones etiam venire in partem & societatem meritorum: per eaq; ita me pati; ut non succumbam: ita me sequi, ut non deficiam; ita certare, ut non cadam: ita vivere, ut mori non timeam; ita deniq; mori, ut mors mea sit initium vitæ istius, in quo æternos Crucis fructus tecum beatè degustem, & laudes tuas cum Beatis omnibus æternum decantem.



#### IV. AD EUNDEM AF- FECTUS S. COMMUNIONIS.

*supra*

Dulcissime IESV Panis viventium, &c.

#### V. AD SPIRITUM SANCTUM.

**Q** Sancte Spiritus! ô Bonitatis Prin-  
cipium!

O Deus amoris, in quo spiro, per  
quem spero, ad quem suspiro; cujus est a-  
mare proprium & consolari.

Ad te, amore licet & consolatione æquè  
indignus, supplex advolvor, nihil quidem  
asserens quod mereatur amorem, plurimum  
tamen, quod desideret consolationem,

Et per amorem tuum, quod nihil habes  
charius, obtestor, ut & tu miseris meis  
succurras.

Illis, quas & alienum primi Parentis vi-  
tium intulit, & proprium deinde adauxit.

Atq; imprimis sordes animæ meæ, amo-  
ris tui obstacula, fonte gratiæ tuæ abluas:

Mentis meæ cæcitatem & ignorantiam  
lamine Fidei & Sapientiæ dispellas:

Cor-

**Cordis mei teporem, igne amoris tui inflammes:**

**Ariditatem spiritûs mei vigore virtutis tuæ fecundes.**

**Quod quidem cum à te obtinuerò, & Consolatorem laudabò, & Amatorem sperabo:**

**Qualem te utrum habeam, quando cum mortis necessitate luctandum; tantò confido certius, quantò te amaverò sincerius:**

**Vt verò etiam confidam, amo te ex corde, & amare æternum desidero.**

## **VI. AD VIRGINEM MATREM.**

**O** MARIA mea! tot titulis, quot ego tibi obligor beneficijs; tantò mihi benevolentior affectu, quantò propinquior partu; Mater mea es, non conditione naturæ sed gratiæ intus, sub Cruce constituta; quando me genuisti, non ex utero naturalem, sed ex corde filium spiritualem, non quidem doloribus parturientis, certè tamen doloribus morientis; non tui, sed in te morientis Filij tui unice dilecti:

**Ec-**

Ecce! iam Mater mea, venit ad te f'ius  
tuus, Primogenito tuo. longè dissimilis, &  
inter adoptivos tuos infimus; filius tamen  
tuus ad te Matrem suam & supplicat pro  
salute suâ, sanguine Filij tui partâ, lacry-  
mis tuis impetratâ, patrocinio tuo. obti-  
nendâ.

Monstra ergo te Matrem, & respice filium,  
Quo nomine si ille indignus est, tu cer-  
te materno dignissima: respice. ut suc-  
curras; recipe, ut salves: succurras au-  
xilium, salves patrocinio.

Respice, & non despiciet Filius; recipe, &  
non seducet inimicus.

Et si quid in me offendis, unde displice-  
am; in te reperis, unde placeam; per te  
scilicet reconciliato Filio.

Quod ut à te impetrem vivus, & obtineam  
mortuus, per illud tibi charissimum, &  
mihi dulcissimum Nomen Matris sup-  
plico.

## VII. AD S. ANGE- LUM CUSTODEM.

**O** Custos Angele, à primo vitæ mo-  
mento mihi fidelissime, salutis meæ  
nun-



nunquam non studiosissime, agnosco benevolentiam tuam in officio, liberalitatem tuam in beneficio, humilitatem in obsequio.

Cœpisti mihi bene velle, cū cœpi vivere; benefacere, cū cœpi mala pati, (pateris enim, & mala pateris, cum me iustitias malum, quem cuperes bonum;) per istum tam constantem in me animum, cui toties vitam, incolumitatem, & salutem debeo. Quoties ea non peridi peccando, aut tu perniciem meam avertisti deprecando. Per illum, inquam, tuum in me affectum rogo, dirige porrò vitæ meæ cursum, ut à salutis, virtutis, & perfectionis tramite, nec emollitus carnis illecebris, nec inescatus mundi pompis, nec captus diaboli infidijs unquam deflectat, sed ad metam usque, unde incipit æternitas, decurrat.

Quam tantò amplius tibi spero cordi futuram; quantò pluribus illa periculis est obnoxia:

Quæ ut in vita & morte evadam, tu consilium temporis suggere, & manum in necessitate porrige.

## VIII. AD SANCTOS PATRONOS.

**O** Sancti! vitæ, salutisq; meæ Patroni. N. N. N. communi omnium, & meâ imprimis veneratione dignissimi! Vos ego amoris ductu singularis præcipuè colendos & invocandos mihi delegi, vobisq; me, ac mea, spei vestræ nixus fiducia, commisi.

Agnosco vestros in me favores, & meam erga vos ingratitudinem, qui tot vestris occupatus beneficijs, non respondi obsequijs, toties sensi in necessitatibus amoris vestri opem, & non retuli honoris mei vicem.

Agnosco intercessionis vestræ patrocinium, & obligationis meæ vinculum; istud ut deinceps mihi à vobis secure pollicear, hanc explere sedulè conator.

Et vestras ubiq; laudes diffundere, cultum vestrum propagare, exemplum deniq; vestrum sectari.

Quod ut præstem, vestra iterum faciet benevolentia, cui & vitam meam universam offero, ductu vestro transigendam, &

mor-

mortem commendo vestro in conspectu, & sub tutela vestra obeundam.

Vos ô Sancti N. N. N. de vestra iam salute securi, de me estote solliciti: Et quos in vita Patronos elegi, in morte patrocinantibus experiar: victurus deinceps vobiscum beatè patrociniij vestri memor æternū.

## PROTESTATIO

*Contra omnes inimici insidias.*

**S**umme Deus, quem immensū credo, & ubiq, præsentem confiteor! Mater Virgo, Michâël Archangele, Custos Angele, Sancte Ioseph, Patroni mei reliqui N. N. Sancti omnes, quos in verbō agnoscere non dubito, quæcunq, ego de me constare vobis, ad gloriam vestram, & salutem meam desidero!

Sisto me coram vobis, & conscijs vobis protestor.

1. Detestari me ex animo omne peccatum meum, & quidquid oculis vestris in me displicet:

E

Nec

Nec deinceps admissurum aliquid, quod  
novero displicere.

2. Protestor credere me: quidquid Ec-  
clesia Romana, cujus membrum sum, cre-  
dendum proponit; erroresq; omnes ab ejus  
sensu alienos execrari.

3. Sperare item me peccatorum meo-  
rum veniam, per fustum pro me I E S V  
Christi sanguinem, & æternam meritorum  
meorum retributionem.

4. Amare me ex animo unicè amabilem  
Deum meum, & amaturum, quidquid eti-  
am adversi immiserit; ac præter mentem,  
arbitriumq; meum futurum, si quid natu-  
ra colendi impatiens reluctetur.

5. Invisas mihi esse, & ut confido, dein-  
ceps fore, omnes rerum caducarum ille-  
cebras, nec ijs captum, detrectare me, aut  
detrectaturum Divinæ tuæ Providentiæ  
circa me, vitamq; ac mortem meam pla-  
citum.

6. Nolle me ullum rei cuiuspiam à me  
bene gestæ plausum: ac omnino velle vive-  
re, ac mori, quomodo me tu Deus meus  
volueris.

7. Et hanc voluntatem meam firmissimè  
mihi modò decretam cupere me, in vita  
& in

& in morte esse incommutabilem.

Quod ut consequar, à te imprimis Deus Optime, Maxime, à te deinde Virgo Mater, Archangele Michaél, Custos Angele, Sancte Ioseph, cæteri Patroni N. N. Sancti omnes, ex animo obtestor.

B R E V I S  
SUPERIORUM AFFECTUUM  
SYNOPSIS,

Ad usum frequentiorem contracta.

**C**Redo in te ô Deus Veritas, & quidquid te revelante Fides docet, & Ecclesia proponit: adauge in me Fidem, & da, ut in illa sincerè vivam, & constanter moriar.

Spero in te ô infinita Fidelitas, unicum ac summum Bonum meum; & spero à te, quam promisisti, veniam, gratiam, & gloriam; & precor, ut hæc spes me non deferat in vita, non confundat in morte.

Amo te ô immensa Bonitas, & quidquid tecum, ac propter te est amabile, idq; ex toto corde meo. Et hoc amore opto ani-



mari totam vitam meam, & vitæ meæ exitum terminari.

Detestor ex animo ô æterna Maiestas, omne peccatum meum, non quia summum meum malum est, sed quia summa tua offensâ est. Et nollem illud unquam à me commissum, ac statuo te adiuvante nunquam illud committere, petoque, ut, quem nôsti sine peccato non vivere, dones sine pœnitentia non mori.

Resigno me tibi ô Supreme rerum omnium Domine; tuoq; beneplacito vitam meam universam subdo, firmiterq; decerno, ab illo nec in prosperis, nec in adversis, nec in vita, nec in morte recedere.

Agnosco Beneficentissime Deus Divinam tuam in me liberalitatem, tot beneficijs testatam, quot vixi momentis; tot meis obsequijs dignam, quot habeo mentis, cogitationis, animi affectus, corporis membra, respirandi vires: gratiasq; ago ex animo, meq; in compensationem integrè reddo, quoad totus per mortem transeam in gratitudinis holocaustum, æternis à me gratijs tibi offerendum.

O Deus meus. & omne Bonum meum! pudet me, quòd te non contentus Bono in-

infinito, bonitatis exiguae umbras sim festatus: detestor præposterum illud studium meum, & renuntio omni bono, quod te minus est, illudq; peto, ut tu solus deinceps expleas omne meum desiderium.

Mitissime Deus, qui non minus te patiendo misericordem, quàm agendo potentem ostendis! Offero me tibi ad ferendum, quidquid immiseris, aut permiseris, ideo solum, quia tu me ferre iubes: petoq; à te istam gratiam, ut non finas patientiam, meam, aut vitæ molestijs, aut malevolorum iniurijs, aut morborum, mortisq; doloribus convelli.

Benignissime Deus, qui, ut me ad petendum allicias, petenti omnia promittis: Ecce fretus promissis tuis, peto veniam reo, solatium afflicto, subsidium egeno, ignaro ductum, infirmo robur, vivo gratiam, morituro perseverantiam: perq; illa promissa tua, quibus Divinam tuam obligasti fidem, rogo, ut petenti annuas, petita dones, donata conserves. O Deus, Pater misericordiarum! ô Fili Dei! misericordiarum consors! ô Spiritus Sancte! miserrorum Consolator, per ista mihi dulcissima Nomina obtestor; ut, quem Patrem appello

pello, Patrem habere merear: quem fratrem & consortem agnosco, fratrem experiar: quem Consolatorem veneror, Consolatorem sentiam, tum maximè, quando cum morte luctandum erit pro æternitate; utque resectus Pane vitæ, Crucis virtute adiutus, patrocinate Matre Virgine, tutante Archangelo Michâële, assistente Angelo Custode, Patronis meis succurrentibus Beatis omnibus auxiliantibus, felicem consequar devictâ morte æternitatem, Amen.



CORONA PRE-  
CATORIA,

DE

SANCTISSIMIS & SVA-  
VISSIMIS

IESU CHRISTI

PLAGIS,

*Ab ijs recitanda, qui bonæ mortis cu-  
pidi, se Crucifixo IESV, & MA-  
RIÆ, prope Crucem collacri-  
manti mancipaverunt.*

**A**Vrea hæc de quinque IESV Christi  
Plagis Corona, quinque continet pe-  
culiarium Orbium series, in quorum  
singulis quinque Orationes Dominicæ &  
una Oratio Angelica recitantur. In Ora-  
tionibus Dominicis considerantur acerbis-  
simi cruciatus IESV Christi: in Oratione  
Angelica MARIE dolor contemplatur.  
E singulis verè Plagis, dulcissimis tanquam  
è fontibus donum aliquod est hauriendum:  
è Plaga sinistri Pedis omnium peccatorum

re-

remissio expetitur, è Plaga Pedis dexteri adeptio virtutum, & præsertim fortitudo contra tentationes, & conatus mali dæmonis exposcitur; è Plaga sinistræ ab inferorum supplicijs libertas postulatur: è Plaga dextera cœlestis regni possessio efflagitur: è Plaga Lateris, suavissimo velut ex alveo, melleus, & sincerus IESV, ac MARIE amor exoratur: unicuiq; demum Coronæ hujus seriei his cantiunculis finem impones.

Gloria Patri, & Filio, & Spiritui Sancto, sicut erat in principio, & nunc, & semper, & in sæcula sæculorum, Amen.

*Sancta Mater istud agas,  
Crucifixi fuge plagas,  
Cordi meo validè.*

Qui tamen Coronam hanc recitare nequibit, quinque Orationes Dominicas, & quinque Angelicas, cum quinque Gloria Patri recitabit, ad dulcissimarum Plagarum decus, & ornamentum, quinque illa dona nuper relata, & eo, quo dictum est, ordine postulando.

*Me.*



*Methodus meditandi hanc ean-  
dem Coronam.*

**Q**Vinque Plagarum precatoriam Coronam meditari unusquisq; poterit, varios tum intelligentiæ, tum voluntatis actus eliciendo. In singulis Plagis tres ab intelligentia actus eliciendi sunt, amorem modò, modò dolorem, modò Plagæ illius, quam meditatatur, pretium perpendendo; voluntas quoq; tres actus eliciat, gratias agendo, veniam precando, & quinque illa dona modo nuper dicto exorando, in quinque verò precarijs globulis alijs etiam actus eliciantur hoc modo:

*Primò.* In globulis precarijs primæ seriei quinque actibus sinistri Pedis Plaga veneraberis. 1. Recognoscendo te hominem nequam, imbecillem, & peccantem; hujusmodi enim es, in iniquitatibus, & peccatis conceptus. 2. Talem te hominem esse, pro certo habeas. 3. Talem ab omnibus haberi cupias. 4. Omnibus te creatis rebus postponas, in aliarum singulis Dei immortalis dona contemplans, in te verò, quod à te habes, considerans. 5. *Æ-*  
quo

quo animo adversas res omnes patiaris, cum bono illo fure conclamans: *Nos quidem iuste; nam digna factis recipimus. quinimò, inferiora meritis, cum inferorum poenas promerearis.*

*Secundò.* In globulis precarijs secundæ seriei, quinque etiam actibus, dexteri Pedis Plagam observabis, expressa Christi vestigia sequendo. 1. Christum imiteris in studio propriæ perfectionis. 2. In studio salutis, & perfectionis hominum. 3. In studie Divinæ gloriæ. 4. In Cruce tuam vitam degere cupias, in quam tuus IESVS est adactus, ut cum Divo Paulo dicas: *Christo confixus sum Cruci.* 5. Pro Christo mori desideres, qui pro te mortuus est, atq; his verbis tuum desiderium excites, & pro te mortuum IESVM alloquaris: *Amore amoris tui moriar, qui amore amoris mei dignatus es mori.*

*Tertiò.* In globulis precarijs tertiæ seriei, quinque actibus, sinistræ Plagam veneris, quinque erga homines amoris signa præbendo. 1. Illos tanquam Dei filios, Christi fratres, ipsius sanguine redemptos, & Divini Spiritus templum contempleris. 2. Omnia illis bona cupias. 3. Verbo, &

re illis auxiliaris, Christi verbis intentus; *quod uni ex minimis meis fecistis; mihi fecistis.* 4. Illorum salutem, & incolumitatem procures. 5. Pro ipsorum salute tuam offeras vitam.

*Quartò.* In globulis precarijs quartæ seriei, quinque actibus, dexteræ Plagam meditaberis, quinquies erga immortalem Deum tuum amorem exercendo. 1. Deo suam naturam, suasq; perfectiones innumerabiles gratuleris. 2. Illis gaudeas, & oblecteris. 3. Omne illi creatarum rerum obsequium desideres. 4. Te ad Divinam voluntatem conformes. 5. Augustissimam Dei naturam videre ex animo cupias.

*Quintò.* In globulis precarijs quintæ seriei, quinque actibus, in svavissima Divini Lateris Plaga immoraberis, quinquies ad æternam beatitatem inhiando. 1. Caducas, & fluxas hujus vitæ res asperneris. 2. Maximi ducas æterna, & firma futuræ beatitudinis bona. 3. Hæc bona ab immortali Deo pro viribus postules. 4. Pro tot tantorumq; bonorum adeptione Deo quinque Plagarum pretium offeras. 5. Omnes tuas cogitationes, verba, & opera ad  
ma

maiozem Dei gloriam, & ad vitam æternam dirigas.

Fructus denique, quem ex huius præcatorum Coronæ contemplatione, aurea velut ex arbore decerpere poteris, hic erit, nimirum perfectissima observantia horum trium verborum *Inspice, Abstine, & Sustine*. Habitabis liquidem cogitatione & amore in dulcissimis IESV Christi Plagis, in quibus quinque tibi facies tabernacula: in ijs enim te esse bonum est. Abstinebis ab omni humanarum rerum iucunditate, unâ Sacrorum quinque Christi Vulnerum sinceritate expletus. Sustinebis deniq; lubenti animo calamitatem omnium impetum, omniaq; tuorum hostium tela tutus excipies, fortissimo quinque IESV Christi Ducis nostri Plagarum clypeo protectus.

*In sanguine Christi, & gratia MARIE, Am.*

**A S P I R A T I O N E S**  
Pro Felici Obitu  
**AD CHRISTUM.**

**N**on intres in iudicium cum servo tuo dulcissime IESV, quia non iustificabitur in conspectu tuo omnis vivens. Ne

Ne memineris Bone IESV iniquitatum  
mearum: citò anticipent me misericordiæ  
tuæ, quia pauper factus sum nimis.

Illumina mansuetissime IESV oculos me-  
os, ne unquam obdormiam in morte, ne  
quando dicat inimicus meus, prævalui ad-  
versus eum.

Domine IESV Christe Fili Dei vivi po-  
ne Passionem, Crucem, & mortem tuam,  
inter iudicium tuum, & animam meam.

Bone IESV, per extremas illas in Cruce  
voces, quibus Patri Spiritum commendâ-  
sti, te rogo, suscipe spiritum meum in fine  
vitæ meæ.

O mi amantissime Domine IESV Chri-  
ste! ob honorem & virtutem tuæ benedi-  
ctæ Passionis, iube me adscribi in numerum  
Electorum tuorum.

Salvum fac servum tuum Domine Deus  
meus speranter in te.

Tuus sum ego, salvum me fac. Ne per-  
das cum impijs Deus animam meam.

IESVS esto mihi IESVS, & salva me.  
Domine IESV accipe spiritum meum.

In te Domine IESV speravi, non con-  
fundar in æternum.

AD

## AD BEATISSIMAM VIRGINEM.

**M**ater Dei, memento mei, nunc, & in  
hora mortis

Adsis mihi Domina in omnibus actioni-  
bus meis, nec me deferas in hora  
mortis.

Adesto mihi Domina cum tota æternita-  
te depugnanti

MARIA Mater gratiæ,

Mater misericordiæ,

Tu nos ab hoste protege,

Et horâ mortis suscipe.

Vitam præsta puram,

Iter para tutum,

Vt videntes IESVM

Semper collætémur.

## AD SANCTOS ANGELOS.

**S**uccurrite, subvenite, o vos omnes Bea-  
tissimi Spiritus! Sancti Angeli Dei; &  
cùm in extremis vestram opem non am-  
plius implorare potero, ne me deserite.  
Sancte Angele Custos, defende me in  
hoc prælio, ut non peream in tremendo  
iudicio.

AD



## AD OMNES SANCTOS.

**S**ancti Dei omnes intercedere dignemini pro animæ meæ salute.

Moriatur anima mea morte Iustorum,  
sed vivat prius vitâ Iustorum, Amen.

### H O M A G I A,

In Vita & Morte Deo præ-  
standa.

*Reddite, quæ sunt Dei, Deo. Matth: 22.*

### HOMAGIUM I.

Summæ Excellentiæ, Primo Fon-  
ti omnis Esse, Domini Vitæ  
& Mortis.

## ACTUS ADORATIONIS.

*Dominum Deum tuum adorabis. Luc: 4.*

**A**Gnosco te ô mi Deus: ut Supremum  
Dominum meum, Primum Principi-  
um, & ultimum finem meum, Authorem  
naturæ, gratiæ, & gloriæ: & profundissi-  
ma cum humilitate te adoro Dominum vi-  
tæ & mortis, tibiq; sponte sacrifico vitam  
meam, in unione Sacrificij Filij tui Do-  
mini nostri IESV Christi in Cruce, & ado-  
rationis, quâ B. V. MARIA, & omnes Sa-  
cti

et te adorârunt in terra, æternùm te adorabunt in cælo.

## HOMAGIVM II.

Primæ Veritati.

### ACTUS FIDEI.

*Sine Fide impossibile est placere Deo.*

Heb: ii.

**O** Mi Deus! Suprema & Essentialis Veritas! Credo te unum in Essentia, & trinum in Personis, Patrem, Filium, & Spiritum Sanctum. Credo, teneo, ac profiteor Fidem illam, quam Christus docuit, quam prædicaverunt Apostoli, quam Sancta Romana Dei Ecclesia docet ac profitetur, & singulos Catholicæ Fidei articulos paratus sum sanguine meo subsignare, & morte mea confirmare.

## HOMAGIVM III.

Omnipotentia & Misericordia Dei.

### ACTUS SPEI.

*Nolite amittere confidentiam vestram, quæ magnam habet remunerationem. Heb: 10.*

**O** Mnipotens & misericors Deus, cui proprium est misereri semper & par-

uere

do-  
cere. Spero per sanguinem & merita IESV Christi Redemptoris mei ab infinita Bonitate, ac Clementia remissionem peccatorum, quibus te summum Bonum meum gravissimè offendi. Spero in te ô æterna Felicitas mea! qui es meta omnium desideriorum, & humanæ mentis plena satietas. Spero firmissimè me à Paterna liberalitate tua obtenturum omnia ad salutem obtinendam mihi necessaria, gratiam copiosam, & gloriam sempiternam.

*HOMAGIUM IV.*

Summæ Bonitati Dei.

ACTUS AMORIS:

*Diliges Dominum Deum tuum ex toto corde tuo. Luc: 10.*

ne  
o.  
cui  
ar-  
ere  
**A**Mo te ô amabilissime Deus! ex toto corde meo super omnia, propter infinitam Bonitatem tuam. Vellem, si possem, amare te illo amore, quo te amant omnes Sancti, & IESVS Christus Filius tuus; quo te ipsum infinitè amas: & ex sincerissimo tui amore intentissimè doleo, quòd te summum Bonum meum peccatis meis toties offenderim. Quidquid unquam perpeffus sum, & quidquid patior, patiarve

omne illud ex motivo sanctissimi amoris tui  
offero gloriæ tuæ. Amor tuus perficiat  
dolores meos, efficiatque, ut quantum me  
cruciant, tantum te delectent. Patiar, quia  
tu præcipis, quem ardentissimè amo super  
omnia. Tibi me totum in holocaustum con-  
secro, ô Deus cordis mei, & pars mea Deus  
in æternum!

### *HOMAGIUM V.*

Divinæ Providentiæ.

### ACTIO GRATIARUM,

Pro omnibus medijs ad salutem.

*In omnibus gratias agite. 1. Thess: 5.*

**G**ratias tibi ago infinitas, Liberalissime  
Deus, pro innumeris beneficijs mihi &  
toti mundo à Paterna & benignissima Pro-  
videntia tua indefinenter collatis, pro me-  
dijs ad salutem aptissimis ab æterno mihi  
preparatis, pro copiosis naturæ & gratiæ  
donis, quibus me miserrimam & ingratis-  
simam, tuoq; amore indignissimam creatu-  
ram cumulare non desinis. O utinam tan-  
tis beneficijs tuis nunquam contra te abu-  
tar, sed omnia purissimâ intentione refe-  
ram in te solum fontem inexhaustum bo-  
norum omnium, in gratiarum actionem of-

fero

fero tibi ô Pater amantissime me totum, & omnia mea, atq; ex animo gaudeo, hæc omnia infinitis titulis tibi iam dudum fuisse debitas quæ tibi novo amoris & gratitudinis affectu integerrimè consecro.

## HOMAGIUM VI.

Divinæ Iustitiæ.

### ACTUS POENITENTIÆ ET HUMILITATIS.

*Cor contritum & humiliatum Deus non despicias. Psal. 50.*

**O** Iustissime Deus! ego abominandus peccator coram infinita Maiestate ac Bonitate tua prostratus, corde contrito & humiliato confiteor me reum læsæ supremæ Maiestatis tuæ, veniamq; meorum criminum supplex rogo. Detestor ex animo omnia peccata, quibus te amabilissimum Deum meum frequentissimè offendi; & cum gratia tua propono firmissimè, nunquam deinceps offendere infinitam Bonitatem tuam. O utinam omnes halitus mei sint gemitus dolentis ac poenitentis cordis mei! O Iustissime scelerum Vindex, & misericordissime Pater! hinc ure, hinc seca, dummodo in æternum parcas.

## HOMAGIUM VII.

Sacro-sanctæ Trinitati.

### ACTUS GLORIFICATIONIS.

*Laudate Dominum omnes gentes. Psal: 116.*

**B**enedico te, laudo te, glorifico te, ô  
Sacro-sancta Trinitas, unus Deus! Tibi  
soli laus, honor, & gloria ab omni crea-  
tura nunc, & semper. Gloria Patri, qui  
creavit me. Gloria Filio, qui redemit me.  
Gloria Spiritui Sancto, qui sanctificavit  
me. Gloria Patri, qui me sustentat per su-  
am Potentiam. Gloria Filio, qui me gu-  
bernat per suam Sapientiam. Gloria Spi-  
ritus Sancto, qui me sanctificat per suum  
amorem. Benedicta sit Sancta & individua  
Trinitas ab omnibus Angelis & Sanctis, &  
ab omnibus creaturis, nunc, & semper, &  
in sæcula sæculorum, Amen.

*Vide Soliloquia S. Augustini. cap: 37.*

## HOMAGIUM VIII.

Divinæ Sapientiæ, Omnipoten-  
tiæ, & Bonitati.

### ACTUS CONFORMITATIS.

*Fiat voluntas tua sicut in celo & in terra.*

**Math: 6.**

O mi



**O** Mi Deus infinitæ Sapientiæ, Potentiæ, & Bonitatis! O utinam semper integrè exequar sanctissimum beneplacitum tuum, nec unquam contradicam sermonibus Sancti! Tu, Domine, nôsti, quid mihi ad salutem sit magis proficuum. Tu potes, & vis me salvare. Vnicè desidero voluntatem tuam in me & à me semper perfectissimè adimpleri. O Pater amantissime! quidquid vis, quantum vis, quomodo vis, & ego volo. Fiat Domine in me, de me, per me, circa me, & circa mea omnis sanctissima voluntas tua in omnibus, nunc, & in æternum, Amen.

Suscipe proinde Domine universam meam libertatem, accipe memoriam, intellectum, atq; voluntatem omnem. Quidquid habeo, vel possideo: mihi largitus es; id tibi totum restituo, ac tuæ prorsus voluntati trado gubernandum, amore tui solum mihi dones,  
& dives sum satis, nec aliud quidquam ultrà posco, Amen.

CAN-

*C A N T I C A*  
*SPIRITUALIA,*  
*Pro Animabus Sanctis.*

*CANTICVM I.*

**D**eus est in me, & ego sum in Deo, Deus est meus, & ego sum Dei, Deus est propter me, & ego sum propter Deum. Deus cogitat de me, & ego de Deo. Deus quiescit in me, & ego quiesco in Deo. Deus operatur propter me, & ego propter Deum.

O Deus meus, & omnia! quid est, quod quæram, aut desiderem, propter te?

*CANTICVM II.*

**N**ihil supra Deum. Nihil sicut Deus. Nihil cum Deo. Nihil præter Deum.

Vnum uni, solum soli. Totum toti. Cor cordi. Cor, quod amat, nescit dividi. Cor, quod dividitur, nescit, quid sit amare.

O mi Deus! quid est in cœlo, & in terra, quod sit amabile, sicut tu? Quid est in toto universo, quod tibi possit comparari?

*CAN-*

### CANTICVM III.

**O**Mne desiderium meum est, nihil desiderare. Omnis voluntas mea est, nihil velle. Omnis cura mea est, de re nulla esse sollicitum. Omne bonum meum est, nihil possidere.

Inveni, quem diligit anima mea, tenui eum, nec dimittam. Quærebam eum extra me, & inveni eum intra me. Quærebam eum in tumultu, & reperi eum in pace. Quærebam eum in turba, & repeti eum in solitudine. Quærebam eum in mente mea, & inveni eum in corde meo. Quærebam eum de die, & inveni eum in nocte.

Non vidi eum; sed cognovi eum. Cor meum percepit eum modo insensibili. Satiavit me præsentia sua. Implevit omnia desideria mea. Sustulit omnes anxietates meas. Cumulavit me delicijs. Beati, qui hanc quiete fruuntur. Et qui invitati sunt ad nuptias Agni.

### CANTICVM IV.

**D**ile mihi, obsecro, dilecte mi, ubi pascas, ubi cubes in meridie?

In corde puro, & ab omnibus creaturis avulso. Cor meum est locus quietis meæ.

Est

**E**st paradifus deliciarum mearum.

Nullus clamor in domo Dei. Silentium in Paradifo. Domine, non possum ultra loqui, postquam tu mihi locutus es. Plenus sum cogitationibus, nec occurrunt amplius verba, quæ eloquar.

O cor meum! custodi diligenter thesaurum, quem possides. Sponsus ingreditur portis clausis. Egreditur, cum sunt apertæ. Occlude ante omnia portas sensuum tuorum. Pax, amor, secretum, silentium. Ecce hæc animam in tuto ponunt.

### *CANTICVM V.*

**O**Mnia perdididi, nihil ultra habeo, quod perdam. Omnia inveni, nihil est, quod ultrà quæram. Contentus vivo, nîl amplius desidero. Totus Dei sum, nîl ultrà timeo.

Omnia reliqui propter Deum. Omnia in Deo reperi. Desideria mea inciderunt in illum, sicut flumina in mare, sine tumultu, sine distinctione, sine motu, sine violentia, sine arctis aggeribus, quibus intra terræ alveum constringebantur.

Postquam evanuit ex oculis meis, ingressus sum Oceanum, demersi me in hanc abyssum

byssum, perdididi me feliciter. Confudi me-  
um esse cum esse Divino. Eram in tempo-  
re, & credebam me esse in æternitate. E-  
ram creatura, & sentiebam me unitam Di-  
vinitati.

O nox mystica, & fortunata! Vbi Ver-  
bum se univit menti nostræ, in silentio de-  
sideriorum & cogitationum ejus. O quàm  
suavis est hæc hora! Sed, heu! quàm brevis!  
fileat omnis caro in præsentia Domini.

### *CANTICVM VI.*

**M**ors mihi minatur. Circumdatus sum  
tenebris. Agitatus sum procellis. Pro-  
ximus sum portis inferni. Sed hæc omnia  
non me exterrēt. Amor est fortior morte.  
In tenebris sternit lectum suum. Dormit  
securè in medio procellarum. Cælum in-  
venit in inferno. Paradisum suum secum  
circumfert, quia intra se habet, quidquid  
desiderat. Vult omnia, & nihil vult. Possi-  
det omnia, & nihil possidet. Deus est the-  
saurus ejus, & felicitas. Cui Deus est o-  
mnia, totus mundus nihil est.

### *CANTICVM VII.*

**I**ESVS cogitat de me, & ego cogito de  
IESV. IESVS operatur propter me, &

ego

ego propter IESVM. Cor meum illi sufficit, & ille sufficit cordi meo. Ille sibi complacet in me, & ego mihi complaceo in illo. Ecce amoris Canticum! quod ipsi concino diu noctuque. Curam aliam non habeo, quàm ut nullam curam habeam. Vnum bonum, quod desidero, est nihil desiderare. Vivere sine cura, & sine desiderio, est omnis mea delectatio.

### *CANTICVM VIII.*

**Q**uid est, quod sentio in imo animæ meæ? Quid est, quod agitur in imo cordis mei? Nuptiæ fiunt in Cana. IESVS, illic operavit miraculum. Aquam mutavit in vinum. Ingressus est mediâ nocte clausis portis sensuum.

Vidi eum, cum non viderem. Cognovi eum, cum non cognoscerem. Oculus meus non vidit eum transeuntem. Auris mea non audivit ingredientem? Sensi odorem ungventorum ejus. Gustavi mel dulcedinis ejus.

O mi Deus! in quam Regionem me deducis? An versor in cœlo, an in terra? An vivo in tempore, an in æternitate? Video te sine imagine. Tango te sine corpore.

Sen-



Sentio te sine organo. Procul dubio iam  
verfor in Paradiso. Si diutius ita frui dile-  
cto meo concessum fuerit, oportebit me  
mori.

### *CANTICVM IX.*

**R**Ecede à me Dilecte mi. Sed non di-  
me desere. Subtrahe mihi tuam præsen-  
tiam, sed non subtrahe mihi tuum amo-  
rem. Subtrahe tuas delicias, sed relinque  
mihi dolores tuos. Exime Paradisum, tu-  
um ex anima mea, aut rape animam meam  
in Paradisum tuum. Non possum gaudere,  
nisi in Cruce. Nisi occasiones aspera pati-  
endi mihi suppedites, mortem mihi acce-  
leres. Liberalis nimis es in solatijs, at par-  
cus nimis es in doloribus.

O Deus meus! amor meus! Omnis dele-  
ctatio mea est pati. Omne desiderium me-  
um est mori. Anima mea, cane semper pul-  
chrum hoc amoris Canticum.

Fixum mihi est in omnibus exequi be-  
neplacitum Dei. Complacibo mihi in  
Deo. Complacabit sibi Deus in me, cum  
mihi complacibo in illo. Contestabor me  
in Deo solo plenè conquiescere, cum inter  
ærumnas meas tranquillus degam. Non  
quie-

quiesco in Deo, si murmurem contra Deū.

## CANTICVM X.

**S**ummæ mihi gloriæ ducō, propter te  
contemni. Omnes divitias meas æsti-  
mo, nihil possidere præter te. Omnis de-  
lectatio mea est, multa aspera pati pro-  
pter te.

Vivo ego; iam non ego. Sum ego, & non  
sum idem ego. Tu & ego unum sumus. Om-  
nes voluntates meæ defecerunt. Omnes  
spēs meæ eversæ sunt. Omnia desideria  
mea extincta sunt. Totum esse meum an-  
nihilatū est. Non laboro amplius, nisi  
propter te. Non respiro, nisi per te. Non  
subsisto, nisi in te. Tu in me, ego in te.  
Tu pro me, ego pro te.

Esse, ubi vis. Velle, quod vis. Agere,  
quod vis. Pati, quod vis, efficit hominem  
beatū, & perfectū.

O R A T I O

S. BERNARDI,  
AD IESUM CRU-  
CIFIXUM.

*Quam dum coram Crucifixo recita-  
ret*

ret, Christus ad eum se inclinavit,  
& dulciter amplexus est, ut scribit  
B. Hugo Carthusianus in suo horto  
Devotionis; & addit: omnes, qui e-  
am cum Devotione dixerint, in ho-  
ra mortis singularem Devotionis  
sensum experturos.

## DOMINICA.

### *Ad Pedes.*

**S**alve mundi salutare,  
Salve, salve IESV chare,  
Cruci tuæ me aptare,  
Vellem verè; tu scis quare,  
Da mihi tui copiam.  
Ac si præfens sis, accedo,  
Imò præsentem credo:  
O quam nudum hic te cerno,  
Ecce tibi me prosterno.  
Sis facilis ad veniam.  
Clavos pedum, plagas duras,  
Et tam graves impressuras,  
Circumplector cum affectu,  
Tuo pavens in aspectu,  
Tuorum memor vulnere.

Gra-

Grates tantæ charitati,  
Nos agamus, vulnerati:  
O Amator peccatorum,  
Reparator confractorum,  
O dulcis Pater pauperum.  
Quidquid est in me confractum,  
Dissipatum, aut distractum;  
Dulcis IESV totum sana;  
Tu restaura, tu complana,  
Tam pio medicamine.  
Te in tua Cruce quæro,  
Prout queo, corde mero:  
Me sanabis hic, ut spero,  
Sana me, & salvus ero,  
In tuo lavans sanguine.  
Plagas tuas rubicundas,  
Et fixuras tam profundas,  
Cordi meo fac inscribi,  
Ut configar totus tibi,  
Te modis amans omnibus.  
Dulcis IESV, pie Deus,  
Ad te clamo, licet reus,  
Præbe mihi te benignum,  
Ne repellas me indignum,  
De tuis sanctis pedibus.  
Coram Cruce procumbentem,  
Hosq; pedes complectentem,

IESV bone non me spernas,  
Sed de Cruce Sancta cernas,  
Compassionis gratiâ.  
In hac Cruce stans directè,  
Vide me, ô mi dilecte,  
Ad te totum me converte.  
Esto sanus, dic apertè,  
Dimitto tibi omnia.

## F E R I A II.

### *Ad Genua.*

**S**alve IESV Rex Sanctorum,  
Spes votiva peccatorum,  
Crucis ligno tanquam reus,  
Pendens homo, verus Deus,  
Caducis nutans genibus.  
**O** quam pauper! ô quam nudus!  
Qualis es in Cruce ludus:  
Derisorum iocus factus,  
Sponte tamen non coactus,  
Attritus membris omnibus.  
Sanguis tuus abundanter,  
Fusus fluit incessanter,  
Totus lotus in cruore,  
Stans in maximo dolore,  
Præcinctus vili tegmine.  
**O** Maiestas infinita,

**O** ege-

O egestas inaudita,  
Quis pro tanta charitate,  
Quærit te in veritate,  
Dans sanguinem pro sanguine.  
Quid sum tibi responsurus,  
Actu vilis, corde durus?  
Quid rependam Amatori,  
Qui elegit pro me mori,  
Ne duplâ morte morerer.  
Amor tuus, amor fortis,  
Quem non vincunt iura mortis:  
O quàm pia me sub cura,  
Tua foves in pressura,  
Ne morsu mortis vulnerer.  
Ecce tuo præ amore,  
Te complector cum rubore,  
Me coopto diligenter,  
Tu scis causam evidenter,  
Sed suffer, & dissimula.  
Hoc quod ago, non te gravet,  
Sed me sanet, & me lavet,  
Inquinatum, & ægrotum,  
Sanguis hic fluens per totum,  
Ut non supersit macula.  
In hac Cruce te cruentum,  
Te contemptum, & distentum,  
Ut requiram, me impelle,



In hoc imple meum velle,  
Fac Deus, quod desidero.  
Vt te quæram mente purâ,  
Sit hæc mea prima cura:  
Non est labor, nec gravabor,  
Sed sanabor, & mundabor,  
Cum te complexus fuero.

F E R I A III.

*Ad Manus.*

**S**alve IESV Pastor bone,  
Fatigatus in agone,  
Qui per lignum es distractus,  
Et ad lignum es compactus,  
Expansis sanctis manibus.

Manus sanctæ vos avete,  
Rosæ novis adimplete,  
Hos ad ramos dirè iunctæ,  
Et crudeli ferro punctæ,  
Tot guttibus decurrentibus.

Ecce fluit circumquaque,  
Manu tua de utraque,  
Sanguis tuus copiosè,  
Rubicundus instar rosæ,  
Magnæ salutis pretium.

Manus clavis perforatas,  
Et cruore purpuratas,

Corde premo præ amore,  
Sitibundo bibens ore,  
Cruoris stillicidium.

O quàm largè te exponis,  
Promptus malis, atq; bonis:  
Trahis pigros, pios vocas;  
Et in tuis ulnis locas,  
Paratus gratis omnibus.

Ecce tibi me præfento,  
Vulnerato & cruento:  
Semper ægris unifereris.  
De me ergo ne graveris,  
Qui præstò es amantibus.

In hac Cruce sic extensus,  
In te meos trahe sensus,  
Meum posse, velle, scire,  
Cruci tuæ fac servire,  
Me tuis apta brachijs.

In tam lata charitate,  
Trahe me in veritate,  
Propter tuam Crucem almam,  
Trahe me ad Crucis palmam,  
Dans finem meis vitijs.

Manus sanctæ vos amplector,  
Et gemendo condelector,  
Grates ago plagis tantis,  
Clavis duris, guttis sanctis,

Dans

Dans lacrymas cum osculis  
In cruore tuo lotum,  
Me commendo tibi totum:  
Tuæ sanctæ manus istæ,  
Me defendant IESV Christe,  
Extremis in periculis.

## F E R I A IV.

### *Ad Latus.*

**S**alve IESV summè bonus,  
Ad parcendum nimis pronus,  
Membra tua macilenta,  
Quàm acerbè sunt distenta,  
In ramo Crucis torrida.

Salve Latus Salvatoris,  
In quo latet mel dulcoris.  
In quo patet vis amoris,  
Ex quo scatet fons cruoris,  
Qui corda lavat sordida.

Ecce tibi appropinquo,  
Parce IESV, si delinquo,  
Verecundâ quidem fronte;  
Ad te tamen veni sponte,  
Scrutari tua vulnera.

Salve mitis apertura,  
De qua manat vena pura,  
Porta patens & profunda,

Super rosam rubicunda,  
Medela salutifera.  
Odor tuus super vinum,  
Virus pellens serpentinum;  
Potus tuus, potus vitæ,  
Qui fititis, huc venite;  
Tu dulce vulnus aperi.  
Plaga rubens aperire,  
Fac cor meum te fitire,  
Sine me in te transire,  
Vellem totus introire,  
Pulsanti pande pauperi.  
Ore meo te contingo,  
Et adester ad me stringo.  
In te meum cor intingo,  
Et ferventi corde lingo,  
Me totum in te trajice.  
O quàm dulcis sapor iste,  
Qui te gustat IESV Christe,  
Tuo victus à dulcore,  
Mori posset præ amore,  
Te unum amans unicè.  
In hac fossa me reconde,  
Infer meum cor profundè,  
Vbi latens incalescat,  
Et in pace conquiescat,  
Nec prorsus quemquam timeat.

Ho.

Horâ mortis meus status,  
Intret IESV, tuum Latus,  
Hinc expirans in te vadat,  
Ne hunc leo trux invadat,  
Sed apud te permaneat.

F E R I A V.

*Ad Pectus.*

**S**alve salus mea Deus,  
IESV dulcis amor meus,  
Salve pectus reverendum,  
Cum tremore contingendum,  
Amoris domicilium.

Ave Thronus Trinitatis,  
Arca latæ charitatis,  
Firmamentum infirmitatis,  
Pax & pausa fatigatis,  
Humilium Triclinium.

Salve IESV reverende,  
Dignè semper inquirende,  
Me præsentem hic attende,  
Accedentem me succende,  
Præcordiali gratiâ.

Pectus mihi confer mundum,  
Ardens, pium, gemebundum,  
Voluntatem abnegatam,  
Tibi semper conformatam,

Iun-

Iunctâ virtutum copiâ.  
IESV dulcis, Pastor pie,  
Fili Dei, & MARIE,  
Eargo fonte tui cordis;  
Fœditatem meæ fordis;  
Benigne Pater, dilue.

Ave splendor & figura,  
Summi Dei genitura,  
De thesauris tuis plenis,  
Desolatis, & egenis,  
Munus clementer proflue.

Dulce IESV Christi pectus,  
Tuo fam dono rectus,  
Absolutus à peccatis,  
Ardens igne charitatis,  
Vt semper te recogitem.

Tu abyssus es Sophiæ,  
Angelorum Harmoniæ  
Te collaudant; ex te fluxit;  
Quod Ioannes cubans fuxit;  
In te, fac, ut inhabitem.

Ave fons benignitatis,  
Plenitudo Deitatis  
Corporalis in te manet,  
Vanitatem in me fanet,  
Quod tu confers consilium.

Ave verum Templum Dei,

Pre-



Precor, miserere mei,  
Tu totius Arca boni,  
Fac Electis me apponi,  
Vas dives Deus omnium.

F E R I A VI.

*Ad Cor.*

**S**ummi Regis Cor aveto,  
Te saluto corde lato,  
Te complecti me delectat,  
Et hoc meum cor affectat,  
Ut ad te loquar, animes.

Quo amore vincebaris,  
Quo dolore torquebaris,  
Cum te totum exhaurires,  
Ut te nobis impertires,  
Et nos à morte tolleres.

**O** mors illa quàm amara,  
Quàm immitis, quàm avara,  
Quæ per cellam introivit,  
In qua mundi vita vivit,  
Te mordens cor dulcissimum.

Propter mortem, quam tulisti,  
Quando pro me defecisti,  
Cordis mei ô Cor dilectum,  
In te meum rape affectum,  
Hoc est, quod opto plurimum.

**O Cor**

● Cor dulce, prædilectum,  
Munda meum cor illectum,  
Et in vanis induratum,  
Pium fac, & timoratum,  
Pulso torpenti frigore.

Per medullam cordis mei,  
Peccatoris atque rei,  
Tuus amor transferatur,  
Quo cor totum rapiatur,  
Langvens amoris vulnere.

Dilatare, aperire,  
Tanquam Rosa fragrans mirè,  
Cordis meo te coniunge:  
Vng. illud, & compunge:  
Qui amat te, quid patitur?

Quidnam agat, nescit verè,  
Nec se valet cohibere,  
Nullum modum dat amori,  
Multâ morte vellet mori,  
Amore quisquis vincitur.

Vivâ cordis voce clamo;  
Dulce Cor te namq; amo,  
Ad cor meum inclinare,  
Ut se possit applicare,  
Devoto tibi pectore.

Tuo vivat in amore,  
Ne dormitet in torpore,

Ad te oret, ad te ploret,  
Te honoret, te adoret,  
Te fruens omni tempore.

Rosa Cordis aperire,  
Cujus odor fragrat mirè,  
Te dignare dilatare,  
Fac cor meum anhelare,  
Per flammam desiderij.

Da cor cordi sociari,  
Tecum IESV vulnerari,  
Nam cor cordi similatur,  
Si cor meum perforatur,  
Sagittis improperij.

Infer tuam intrà sinum,  
Cor ut tibi sit vicinum,  
In dolore gaudioſo,  
Cum deformi ſpecioſo,  
Quod vix ſeipſum capiat.

Hic, hic pauſet, hic moretur,  
Ecce iam poſt te movetur,  
Te ardentè vult ſitire,  
IESV noli contraire;  
Vt bene de te ſentiat.

S A B B A T H O.

*Ad Faciem.*

**S** Alve Caput cruentatum,  
Totum ſpinis coronatum,

Con-

Conquassatum, vulneratum,  
Arundine verberatum,  
Facie sputis illita.  
Salve cuius dulcis Vultus,  
Immutatus, & incultus,  
Immutavit suum florem,  
Totus versus in pallorem,  
Quem cœli tremit curia.  
Omnis vigor atq; viror,  
Hinc recessit, non admiror,  
Mors apparet in aspectu,  
Totus pendens in defectu,  
Attritus ægrâ macie.  
Sic affectus, sic despectus,  
Propter me sic interfectus,  
Peccatori tam indigno,  
Cum amoris interfigno,  
Appare clarâ facie.  
In hac tua Passione,  
Me agnosce Pastor bone,  
Cujus sumpsi mîl ex ore,  
Haustum lactis cum dulcore,  
Præ omnibus delicijs.  
Non me reum asperneris,  
Nec indignum dedigneris,  
Morte tibi iam vicinâ,  
Tuum Caput hic reclina,

In

AD  
LA  
Aeo  
C

In meis pausa brachijs.  
Tux Sanctæ Passioni,  
Me gauderem interponi,  
In hac Cruce tecum mori,  
Præsta Crucis Amatori,  
Sub tua Cruce moriar.  
Morti tux tom amaræ,  
Grates ago IESV chare,  
Qui es clemens, pie Deus,  
Fac, quod petit tuus reus,  
Vt absq; te non finiar.  
Dum me mori est necesse,  
Noli mihi tunc deesse,  
In tremendæ mortis leora,  
Veni IESV absq; mora,  
Tuere me, & libera.  
Cum me iubes emigrare,  
IESV chare tunc appare,  
O Amator complectende,  
Temetipsum tunc ostende,  
In Cruce salutifera.

AD SANCTUM DISMAM  
LATRONEM CRUCIFIXUM,

*Agonizantium peccatorum Patronū.*

**O** DISMA poenitentium,  
Fatisq; concedentium,

Cœlestis Advocate,  
Ter fauste, ter beate.  
In Golgotha qui passus es,  
Christoq; culpam passus es,  
Et veniam rogâsti,  
Quam lætus impetrâsti.  
Ne quæso me tunc despice,  
Sed ore blando respice,  
Dum lucta me gravabit  
Fatalis, & necabit.  
Dum vita stabit labilis,  
Et scindet implacabilis,  
Vitale parca filum,  
Fer dylce tunc asylum.  
Ne mortis ad sententiam,  
Vei dæmonis præsentiam,  
Immane contremiscam,  
Aut mœstus ingemiscam.  
At menda vitæ totius,  
Piare coner ocyus,  
Nec differam tonantem,  
In ultimum quadrantem.  
Vt IESVS & MARIA me,  
Sicut steterunt ponè te,  
In morte visitare  
Dignentur, & iuvare.  
Ne labe mentem denigrem,

Sed

Sed

Den  
Vt f

A  
mine  
gnun  
dico  
Luc  
X  
R

M

tuz  
DIS  
nem  
ce eff  
SV:  
effica  
flere,  
tis m  
cris i



Sed expiatus emigrem,  
Tuæq; carnis esu,  
Conforter ê mi IESV.

Demum procura coelitus,  
Vt summus hic anhelitus,  
Tendentis ad bravia,  
Sit IESVS, & MARIA, Amen.

*Antiphona.* Dixit Latro ad IESVM: Domine memento mei, dum veneris in Regnum tuum: Et dixit illi IESVS: Amen: dico tibi, hodie mecum eris in Paradiso.

*Luc: 23.*

*V.* Ora pro nobis Beate DISMA,

*R.* Vt digni efficiamur promissionibus Christi.

*Oremus.*

**M**isericordissime IESV, qui pendens in ligno Crucis ineffabile misericordiae tuae infinitae specimen in conversione S. DISMAE Latronis ostendisti: Per sanguinem tuum pretiosissimum pro me in Cruce effusum, obsecro te misericordissime IESV: concede mihi ingratisimo peccatori efficacem tuam gratiam, ut peccata mea de flere, te toto corde amare, & in hora mortis meae à te audire merear: hodie mecum eris in Paradiso, Amen.

*San*

**S**ANCTE DISMA, qui ex infinita IESV  
Christi Domini nostri tecum crucifixi  
misericordia ab eodem audire moriens me-  
ruisti: Hodie mecum eris in Paradiso: Im-  
petra mihi quoq; à misericordissimo IESV,  
ut sicut te per gratiam suam efficacem ad  
veram pœnitentiam & gaudia Paradisi per-  
duxit, ita me eadem efficaci gratiâ ad di-  
gnos pœnitentiæ fructus, veram contritio-  
nem, & perfectum sui amorem impellat,  
& ad gaudia Paradisi perducatur, Amen.

**O R A T I O**  
**AD SANCTUM IUDAM**  
**THADÆUM APOSTOLUM,**

*In rebus desperatis Patronum.*

**G**LORIOSE Christi Cognate, Apostole &  
Martyr, Sancte IUDAM, qui vastissimis  
in Regionibus Fidem exseratis gentibus dis-  
feminasti: virtutibus ac miraculis clarus,  
innumerabiles filios IESV peperisti: per  
illum, qui te sibi Apostolum adscivit, pre-  
cor, ut me miserum à consuetudine pec-  
catorum meorum abstrahas, à cogitationi-  
bus immundis me tuis meritis emundes, &  
in rebus desperatis tuo mihi adsis patro-  
cinio

SV  
ixi  
ne-  
m-  
V,  
ad  
er-  
di-  
io-  
at,  
en.  
M  
,  
&  
is  
is-  
us,  
er  
ce-  
c-  
ni-  
&  
o-  
io

cinio, ac tandem ad invisibilem tuis pro-  
cibus gloriam evehas, ubi Sancta Trinitas  
adoratur in Patre, Filio, & Spiritu  
Sancto, Amen.

*TEMPVS BREVE EST,  
Et cuncta transeunt.*

**Q**uidquid finem habet, breve esse  
convincitur. Labor, afflictio cor-  
poris, nec non alia incommoda,  
quæ hic perpeffus fueris, licet  
centum annos diuturnitate æquarent, tan-  
dem aliquando habebunt finem.

Labor igitur, & corporis afflictio, cæ-  
teraq; incommoda, quamvis centum an-  
norum spatium adimplerent, brevia sunt;  
quin imò, si cum æternitate conferantur,  
momento temporis breviora. Ut quid igi-  
tur tam exiguo vitæ tuæ tempore pro cœ-  
lesti gloria, quæ finem nescit, pati & labo-  
rare detrectas.

De cunctis rebus temporalibus, ad quas  
conquirendas tantum laboris ac studij con-  
tulisti, verum aliquando erit affirmare:  
*Transierunt.*

Potentia *Alexandri*, divitiæ *Cresi*, *Syr-*  
*danapali* voluptates, eloquentia *Demosthe-*

110

*nis*, forma *Helenæ*, atq; venustas corporis modò transferunt. Laudantur ubi non sunt, cruciantur ubi sunt, habitantes cum igne devorante, & cum ardoribus sempiternis. Tempus nunc illis effluxit, tibi non item.

Centum abhinc annis necdum eras natus, in tuo etiamnum eras nihilo, quin imò merum nihil. Post annos centum vivere desieris, atq; adeò prius veròsimiliter, quàm illud tempus præterierit, esca fueris vermibus, atq; ante tremendum æquissimi Iudicis steteris Tribunal.

Quis igitur operæ pretium esse censeat, tanto cum studio in caducorum bonorum adeptionem hic te incumbere, quibus vix comparatis propediem es privandus? Quid enim est ipsum omnino diu, in quo est aliquod extremum? *Nihil est magnum re, quod partem tempore*, ait S. Eucherus. (a)

Ista cogitatio: quamdiu perdurabit hæc corona? quamdiu hanc aulam incolam? quamdiu hisce fruar delicijs? ista, inquam, cogitatio quàm plurimis in divitiarum & voluptatum affluentia viventibus excussit

la-

lacrymas, ijsq; incitamentum & calcar fuit, ut generoso animo omnem fastum, & quidquid caducum est, tanquam fumum atq; umbram aspernarentur. *Subit, cum maximè exultant, cogitatio hæc quamdiu?* inquit Seneca. (b)

Ingentium dolorum origo sæpissimè sunt terrenæ voluptates & nos cum minimè arbitramur, derepentè deserunt.

Satius itaq; est, modò cuncta deferere, quàm postmodum à Deo deferi.

Neq; profectò sapientis, neq; prudentis est, agere velle exiguo tempore vitam commodis & delicijs abundantem non sine manifesto periculo in misérias incidendi sine fine duraturas. *Angustus est animus, quem terrena delectant,* ait Seneca.

*Quæ speras, peritura sunt omnia, & tu quid post hæc? Aliquid ama & spera, quod non transeat,* inquit magnus Gvigo Carthusianorum Generalis(c) hæc attentè cum animo tuo cogita, & sæpe revolve.

Frequenter dies hilariter & perperam transactus adigit non paucos in angustias

H

& so-

(b) *De brevit: vite.*

(c) *De tran-*

*quil: c. 3.*

& sollicitudines maximas, cogitq; eos inter-  
gras noctes insomnes ducere.

*Non omnes, qui senes sunt, vixere  
diu, & quo pacto tanta temporis  
iactura resarciri valeat.*

**D**ies hujus vitæ tibi concessi sunt,  
non ut honoribus te cumules, neq;  
ut commodis, voluptatibusq; inhi-  
as, sed ut animam tuam salvam reddas.  
Multum perdidisti temporis, eò quod in  
alium finem vitæ tuæ dies impenderis.

Non quisquis diu in vivis versatus est,  
vixit diu. Quapropter, licet quadraginta,  
quingenta, sexaginta ætatis annos nu-  
meres, dubium est, an unico anno vixeris,  
quod ne vel unicum fortassis annum in  
vero sinceroq; Dei cultu transegeris. No-  
men habebas quòd viveres, sed eras mor-  
tuus.

Religiosus quidam Ordinis S. Francisci  
annorum quinque & septuaginta, interro-  
gatus, quamdiu in Religioso cœtu vixisset,  
respondit, *dubito, an vel unico momento.*

Adveniente die iudicii non quæretur ex  
nobis, quàm longam, sed quàm rectam du-  
xerimus vitam; *non quamdiu, sed quàm  
bene?*

Omnes



Omnes anni, quibus vixisti Divinâ or-  
batus gratiâ, nequaquam computandi sunt:  
propterea tamen non est, quod desperes.  
Elapsam tempus si non potes redimere,  
certè potes subsecuturo bene uti, atq; ita  
deperditi temporis damnum refarcire: in  
tua enim potestate situm est, pravas con-  
suetudines, atq; indomitos animi tui mo-  
tus refrænare. *Sanabilibus egrotamus ma-  
is*, inquit Seneca.

Penes te etiam est, pijs ac sanctis cogi-  
tationibus, gratijsq; Dei prævenientibus  
bene posthac uti; sufficit vel unica, ut sce-  
leratissimum quemcunq; hominem ad me-  
liorem vitæ rationem traducat.

*Videte Fratres*, ait S. Apostolus Paulus,  
*quomodo cautè ambuletis, non quasi insipi-  
entes*, qui ubi quàm plurima perdidere,  
perdunt etiam id, quod pretiosissimum est;  
*sed ut sapientes redimentes tempus*, (a) id  
est, inquit S. Augustinus, denegantes tem-  
pus vanis colloquijs, futilibusq; & cadu-  
cis negotijs, quibus totum erat applica-  
tum, illoq; impostero fideliter utentes,  
ut salutis vestræ negotium strenuè & se-  
dulò promoveatis.

H2 Sic

(a) Ephes: 5.

Sic egit ne post mortem miser esset, magnanimus ille militum Dux, de quo meminit *Famianus Strada*. (b) Accedebat hic Imperatorem Carolum Quintum, postulaturus, renuntiandi rebus bellicis facultatem, postulatiq; causam edisserens inqueiebat. *Inter mundi negotia; & diem mortis, tempus aliquod intercedat, necesse est.*

Quo, Imperator, audito, æquissimæ Ducis petitioni non tantum annuit, sed & tam præclarum æmulari exemplum, suoq; se abdicare imperio constituit, ac deinde in secessu se totum Deo dare.

Horum illustrium virorum insistere vestigijs si non valeas, neq; ausis, te ipsum adhortare præclarissimis his S. Chrysologi verbis. *Vivamus Deo paululum, qui seculo viximus totum; dedimus corpori annum, demus animæ paucos dies.* (c)

Dic & tu vicissim, tandem aliquando peracta res est; fixum uecretumq; est. Hunc annum transigam, ut Christianum decet. O plus quam satis est, quod triginta vel septuaginta annis vixerim, ut temporalia pertractarem negotia, atq; ut commodis

(b) *Fam: Strada de bello belgico lib: I.*

(c) *Chrysol: serm: 12.*

modis, voluptatibus, genioq; indulgerem. Equum est, nunc tandem me impendere unum, alterumve annum: ut in cultum Dei & in expiationem criminum, atq; in salutem animæ meæ totus incumbam.

Esto: pereat quidlibet; parum refert, dummodo anima conservetur.

*Suscipe igitur obsecro Domine, inquit S<sup>r</sup> Bernardus (d) residuum annorum meorum: pro his verò, quos vivendo perdidisti, quia perditè vixi, cor contritum & humilitatem non despicies.*

Sic comparatus esse debet animus seriocupientis deperditi temporis detrimentum refarcire: totum se applicet, necesse est, castigando corpori, atq; infrænandis, indomitis animi motibus, nec non studio patientiæ, cæterarumq; præstantissimarum virtutum.

*Qualis vita, talis mors.*

**N**emo non optat bene mori: quia bona & beata mors perpetuam parit felicitatem: sed non omnes volunt bene vivere, eò quòd bona atq; perfecta vita magno constet labore.

Ejus--

(d) S. Ber: serm: in Cant:

Ejusmodi profectò votum risu dignum est, atq; explodendum: unum enim sine altero nequaquam obtineri potest.

Decipimus nos ipsi, si credamus bene beatèq; morituros nos, sine prævia, bona, & rectè instituta vita. Non potest bene mori, qui non bene vixerit.

Bona ac sancta mors à bona ac perfecta vita pendet, non secus ac mala mors & infelix ex mala, corruptaq; vita promanat. *Fratres! nolite errare, ait S. Paulus, Deus non irridetur. Quæ enim seminaverit homo, hæc & metet; quoniam qui seminat, in carne sua, id est, qui operatur carnalia, hic de carne, id est, de carnali opere & voluptate metet corruptionem, & mortem tum præsentem, tum æternam. Qui autem seminat in spiritu, id est, qui operatur spiritualia, hic de spiritu, id est de opere suo spirituali, metet vitam æternam.*

Qualis ergo sementis tua fuerit, talis erit messis. Avenam serere, & metere triticum; enormia seminare flagitia, & æternæ vitæ metere fructus, fieri vix potest, ut simul consistent. Quodsi quandoq; fit, rarum admodum, atq; inusitatum miraculum est, quod Christus servator noster edidit

dit in uno latronum, qui cum illo pende-  
bat è Cruce, dum ei dixit: *Hodie mecum  
eris in Paradiso.*

Vtebatur Deus in illius conversione po-  
tentiâ suâ absolutâ, nec non misericordiâ.  
Hinc rectè asserit S. Augustinus: In tota  
Sacra Scriptura invenit duntaxat unum,  
cui post vitam sceleratè actam bene beatè  
que contigit mori: *Vnum*, ne quis despe-  
ret; *unum* solummodò, ne quis inani se-  
spe ac fiduciâ lactet.

Non tamen ea de causâ parem tibi suc-  
cessum polliceri debes, neq; cogitare te,  
cùm malè vixeris, bene, feliciterq; moritu-  
rum; quemadmodum temerarium foret, e-  
xistimare in ardentem fornacem cum tri-  
bus Babyloñijs adolescentibus coniectum  
egressurum inde te incolumem atq; illæ-  
sum; vel cum Sancto Petro calcaturum te  
aquis maris ab interitu tutum.

Divina Providentia res passim omnes ita  
ordinavit, ut naturæ ductum, atq; ordinem  
sequantur. Sic ignem finit comburere, gra-  
via descendere: sic & opprimi malâ ac de-  
plorandâ morte, qui vitam duxêre sceleri-  
bus refertam: sicubi secus evenerit, prodi-  
gium erit, quo peccatorem Deus absolutâ  
suâ

suâ utens potentiâ, eumq; speciali gratiâ præveniens, interdum dignatur (sed rarò admodum) ob rationes, quæ nos fugiunt. Fallitur autem, & malè sibi consulit, quisquis ejusmodi gratiam vel sperare, vel expectare audet.

Qui bene beatèq; mori desiderant, vitam interea agentes malam ac perditam, Deum tentant; siquidem viventem malè, malè etiam mori passim contingit.

Quid ni igitur exclamas cum Sancto Augustino? (e) *Inter brachia Salvatoris mei & vivere volo, & mori cupio.*

*Vtrum expediat citò mori,  
an diu vivere.*

**M**ulti longam vitam desiderant, de bona sanctaq; nihil aut admodum parùm solliciti.

Quid prodest diu vivere, si minùs rectè vivamus? si quotidiana cumulare flagitia non cessemus.

Conducibilius est citò mori, quàm diu vivere hominibus non tantùm bonis, sed & malis, qui, licèt diu viverent, ad frugem tamen nunquam redirent.

Ma-



Mali quemadmodum indies peccata co-  
cervant, ita etiam poenas adaugent; quod  
neutiquam fieret, si superveniens illis mors  
vivendi simul & peccandi adimeret pote-  
statem. *Gravius est, inquit S. Augustinus*  
*(f) ad peccatum vivere, quàm in peccato*  
*mori.*

Boni quantumvis sæpenuerò se culpis  
præteritis per sinceram earum declaratio-  
nem exonerent, novas tamen quotidie con-  
trahunt; & licèt assiduè quàm gratiam suam,  
quàm gloriam amplificent: attamen omni-  
bus bonis operibus suis tantùm Deo hono-  
ris reddere nequaquam possunt, quantum  
vel exiguis suis noxis, in quas quotidie  
recidunt, ei suffurantur.

*Exultemus igitur, inquit S. Chryso-  
stomus, (g) si quando probum & iustum vide-*  
*mus migrare ex hac misera vita, mox enim*  
*recepturus est laborum suorum, operumq; bo-*  
*norum abundantem mercedem.*

Diffiteri mortalium nullus potest, bo-  
num esse, atq; optabile, bene rectèq; vi-  
vere; attamen bene feliciterq; mori, longè  
esse melius atq; optabilius quis neget? ete-  
nim sola bona mors nos certos de nostra  
sa

(g) *In Epist. ad Philip: c. 8.*

salute reddit, bona vita non item.

Illi, qui boni sunt, & magnâ virtute  
præditi, nesciunt quamdiu tales perman-  
suri sint, ignorant itidem, quænam pe-  
candi occasiones sese adhuc oblaturæ sint,  
quibus afficiendi iniurijs, cum quo homi-  
num genere versaturi, tractaturiq; sint ne-  
gotia: præterit illos insuper, an vivat ali-  
qua etiamnum exitialis Dalila,  
cujus venustate & ill-cebris  
victi, in sempiternum  
ruant interitum.



# HYMEROLOGION.

ORTVS & OCCASVS SOLIS

*Litvania, Samogitia, Russia accomodatū*

Dies.	Ortus		Occasus.		Ingress: Solis in 12 signa Zodiaci.
	Hora.	Quadr.	Hora.	Quadr.	
Ianuarius.	1.	8.	2.	3.	1.
	12.	8.	1.	3.	3.
	22.	8.	0.	4.	0. ☉ in ♏
	31.	7.	3.	4.	1.
Februarius.	8.	7.	2.	4.	2.
	15.	7.	1.	4.	3.
	22.	7.	0.	5.	0. ☉ in ♏
	28.	6.	3.	5.	1.
Martius.	5.	6.	2.	5.	2.
	11.	6.	1.	5.	3.
	19.	6.	0.	6.	0. ♌ ☉ in ♌
	26.	5.	3.	6.	1.
Aprilis.	2.	5.	2.	6.	2.
	9.	5.	1.	6.	3.
	15.	5.	0.	7.	0. ☉ in ♏
	23.	4.	3.	7.	1.
	30.	4.	2.	7.	2.
Maj.	8.	4.	1.	7.	3.
	16.	4.	0.	8.	0. ☉ in ♏
	25.	3.	3.	8.	1.

Die	Ortus.		Occasus.		Ingres. Solis in 12 signa Zodiaci
	Hora:	Qua:	Hora:	Qua:	
Iunio	9.	3.	2.	8.	2.
	21. Solst.	3. min: 26.	8.	m. 24.	☉ in ♋
Iulius	7.	3.	2.	8.	2.
	16.	3.	3.	8.	1.
	21.	4.	0.	8.	0. ☉ in ♊
Augustus	2.	4.	1.	7.	3.
	10.	4.	2.	7.	1.
	17.	4.	3.	7.	1.
	24.	5.	0.	7.	0 ☉ in ♏
	30.	5.	1.	6.	3.
Septem.	6.	5.	2.	6.	2.
	12.	5.	3.	6.	1.
	22.	6.	0.	6.	0. Equinox in ♉
	29.	6.	1.	5.	3.
October.	5.	6.	2.	5.	2.
	12.	6.	3.	5.	1.
	18.	7.	0.	5.	0. ☉ in ♏
	25.	7.	1.	4.	3.
Novem.	1.	7.	2.	4.	2.
	9.	7.	3.	4.	1.
	17.	8.	0.	4.	0. ☉ in ♏
	26.	8.	1.	3.	3.
Decem.	9.	8.	2.	3.	2.
	22. Solst.	8. m. 34.	3. min	16.	☉ in ♏
	27.	8.	2.	3.	2.

le  
a  
ci  
31









